

Solucion ta cuminsa cu #Accion!

ACCION  **21**
PLAN DI
PARTIDO
2021 - 2025

 **ACCION21.COM** 

CONTENIDO

HIGHLIGHTS ECONOMIA Y FINANASAS	5 - 22
REFORMA FISCAL	7
REVITALISA ECONOMIA	14
MODERNISACION GUBERNAMENTAL	24 - 31
UN SISTEMA DEMOCRATICO PA SIGLO 21	25
UN GOBIERNO CONFIABEL, RESPONSABEL Y SOSTENIBEL	29
UN APARATO PUBLICO MODERNISA, EFICIENTE Y TRANSPARENTE	31
PLAN SOCIAL - LABORAL	32 - 44
PLAN ACCION SOCIAL NACIONAL ARUBA	33
AHUSTA E LIM Y SEPARA MINISTERIO DI HUBENTUD FOR DI MINISTERIO DI SALUD	34
MANEHO Y AMPLIACION DI STRUCTURA DI CUIDO SOCIAL	36
DERECHONAN IMPORTANTE	40
PLAN ACCION LABORAL	42
INTRODUCCION - ENSEÑANSA	45 - 52
E APRENDIS	46
STRUCTURA DI CUIDO	48
E DOCENTE	49
MINISTERIO DI ENSEÑANSA	50
PROYECTONAN DI INCLUSION	52
CULTURA Y DEPORTE	53 - 64
CULTURA	54
DEPORTE	60
MEDIO AMBIENTE, DESAROYO DURADERO Y BIENESTAR DI NOS ANIMALNAN	65 - 73
MIHOR PROTECCION DI NOS MEDIO AMBIENTE, FLORA Y FAUNA	67
MANEHO DI DESPERDICIO RESPONSABEL	68
BAHA E CONSUMO DI COMBUSTIBEL FOSIL	69

DESAROLLO SOSTENIBLE Y DURADERO	70
BIENESTAR DE LOS ANIMALES	72
SALUBRIDAD PÚBLICA	74 - 80
INFRAESTRUCTURA Y TRANSPORTE	81 - 85
INFRAESTRUCTURA 21	82
TRANSPORTE PÚBLICO	84

INTRODUCCION

E retonan di reforma fiscal cu mi a pone ta cu mester amplia entradanan di gobierno sin medida ariba consumidor of comercio y haci nos e destinacion mas competitivo pa inversion. E resultado di nos reforma fiscal ta un di e sistemanan mas competitivo di impuesto den nos region y Reino. Mi ta calcula cu e lo ta cash flow positivo pa gobierno. Esey kiermen gobierno lo haña mas entrada y esey den combinacion cu reduci tamaño di aparato gubernamental lo nifica surplus cu lo wordo dividi entre inversion den crisis social, enseñasa, salubridad y reduci nos debe nacional. E realidad ta cu nos mester baha e Debe/ PIB bao di 100% si nos kier salvaguardia nos existencia como pais.



HIGHLIGHTS ECONOMIA Y FINANASAS

- ✦ Eliminacion di BBO/BAZV/BAVP (general sales tax 6%), tur invoerrechten (tarifa promedio 12%), tourism levy, environmental levy, car rental tax, gaming tax y deviezen provisie.
- ✦ Introduccion di un BTW:
 - Tarifa standard 12,5%
 - Tarifa reduci 0%
 - Tarifa halto 25% (aplicabel pa producto ariba cual tabata cobra invoerrechten mas halto cu 25% p.e. auto).
- ✦ Reduccion den winstbelasting pa 15%*.
- ✦ Reduccion den inkomstenbelasting pa 25%* ariba tur entrada mas cu 25.000,-
**Un surtax di 5% lo aplica ariba winstbelasting y inkomstenbelasting mientras Aruba su Debe/PIB ta mas cu 100% of pa un maximo periodo di dies aña*
- ✦ Aruba lo pasa pa un sistema di impuesto teritorial manera Singapore caminda tur ganashi ocasiona na Aruba lo ta belastbaar ampliando nos base.
- ✦ Facilita comercio internacional y reduci gasto door di facilita uso di monedanan internacional.
- ✦ Reforma Banco Central pa ta mas eficiente, hunga un rol constructivo pa cu nos economia y introduci limitenan di termino pa Director(a) y directiva di maximo 12 aña.
- ✦ Reduci debe nacional door di busca cooperacion mas profundo cu Hulanda.
- ✦ Haci acceso na sistema financiero un derecho.
- ✦ Introduci flexibilidad laboral.
- ✦ Modernisa e LMA.
- ✦ Conecta otorgamento di permiso pa stranhero pafor di Aruba na condicion di mercado laboral.
- ✦ Regularisa gran parti di esnan indocumenta.
- ✦ Inventarisa e refugiadonan y reconoce cu Aruba ta sobre popula y nos infraestructura no por acomoda tur.
- ✦ Eliminacion di redtape.

- ✦ Centralisa y simplifica procesonan comercial.
- ✦ Hise productividad di sector publico y garantiza tramitamento dentro di un periodo stipula.
- ✦ Introduci Aruba Small Business Association pa empodera negoshinan chikito y emprendedoran.
- ✦ Enfoca ariba calidad y no cantidad den turismo.
- ✦ Mehora y diferencia nos producto turistico cu un experiencia mas autentico.
- ✦ Inverti den nos artistanan.
- ✦ Reduci cantidad di cambernan di hotel a largo plazo.
- ✦ Amplia Parke Nacional Aruba pa mihor manejo di medio ambiente.
- ✦ Regeneracion di centro di Oranjestad y San Nicolas.
- ✦ Regresa San Nicolas na e centro comercial y urbano di nos pais.
- ✦ Introduci un San Nicolas Port Authority y empodera uso multifuncional di e puerto existente.
- ✦ Inventarisa contaminacion ariba tereno di refineria y cuminsa su reuso.
- ✦ Descontamina e tereno di refineria y desaroya San Nicolas Central Business District.
- ✦ Introduccion di un fiber optic broadband network.
- ✦ Legalisacion di cannabis medicinal y recreacional.
- ✦ Inverti den nos cunuceronan.
- ✦ Establece un nivel di produccion alimentario strategico entre islanan ABC.
- ✦ Introduccion di un startup visa pa Reino.
- ✦ Introduci un solo identificacion digital.
- ✦ Conexion internet basico gratis pa tur hogar.

REFORMA FISCAL

IMPUESTO

Como punto di salida nos ta usa e *Landspakket Tema C*. E acuerdo ya caba firma ta compromete nos na un rediseñamento di nos sistema di impuesto. Ta sumamente importante pa Gobierno di Aruba sea proactivo den e tema aki y ofrece e contenido cu berdad lo beneficia nos economia y cumpli cu e metanan ya acorda.

Desde final di segundo guerra mundial Aruba a copy-paste e modelo Hulandes y implementa esaki, incluyendo nos sistema di *belasting*. Contrario na Holanda, nos no ta un pais industrialisa y e modelo Europeo no ta apto pa nos economia ni nos region. Ta importante pa nos delinea cua ta e metanan cu Aruba y Holanda a acorda y pakiko.

Un sistema di *belasting* mas robusto cu un base amplio

VAT / BTW

Con y pakiko?

Modernisacion di nos sistema di *belasting* pa hacie mas robusto y expande e base ta encera introduci un VAT / BTW. Covid-19 a ilustra e debilidad di nos sistema actual caminda ganashinan di negoshi a reduci drasticamente y den hopi caso evapora. Un sistema indirecto di *belasting* ta mas robusto paso gran parti di e entrada di gobierno lo yega a traves di actividad economico manera consumo cu ta menos vulnerabel na *shock* externo contrario na ganashinan di compania.

E segundo meta ta pa crea un base mas amplio y esey tambe ta wordo logra

door di pasa pa un sistema di *belasting* indirecto. Tin un cantidad di *loopholes* den nos sistema di *belasting* actual cu ta encera cu parti di ganashi por wordo hiba *offshore* legalmente.

Ban considera e caso caminda un compania local ta un subsidiario di un compania di afor. E compania doño extranhero por p.e. cobra *equipment lease y/of management fees* cu ta un manera pa saca ganashi di Aruba sin paga *belasting*. Especialmente ora e compania doño ta di un pais cu un tarifa di *corporate tax* mas abao, tin incentivo pa reduci e *belasting* paga na Aruba.

Kiko ta e solucionnan?

1. Pasa pa un sistema di *belasting* indirecto

Mayoria di nos bisiñanan ya caba a modernisa nan sistema di impuesto y pasa pa un *Value Added Tax*.

Di unda e concepto a bin?

E eliminacion di *invoerrechten* entre paisnan miembro di Union Europeo a nifica cu e gobiernonan mester a haña un otro fuente di entrada pa remplasa e fondo nan cu tabata drenta via cobra impuesto ariba importacion. Contrario na un simpel *sales tax* manera BBO, un VAT / BTW ta optimal paso e ta wordo calcula ariba un cadena di declaracionnan haciendo e mas eficaz pa controla. Tambe e ta mas eficiente paso e ta conta solamente ariba e aumento den *prij*s di un bendedor pa otro, contrario na un *sales tax* cu ta wordo aplica ariba e suma total rípidamente resultando na un *prij*s mas halto pa consumidor.

VAT / BTW ta un forma di *belasting* optimal cu hopi pais den nos region ya caba ta implementando.



	VAT/GST	Corporate Tax (highest rate)	Income Tax (highest rate)	Capital Gains Tax	Dividends Tax	Estate/Inheritance, Gift, Wealth Tax	Tax-to-GDP1
Anguilla (UK)	0%	0%	0%	0%	0%	0%	46.70%
Antigua and Barbuda	Standard-15% Reduced-0% Hotel Accom.-12.5%	25%	25%	0%	0%	0%	19.60%
Aruba (Neth.)	6%	25%	52%	0% / 25% relating to substantial interest	0% / 5% / 10%	2% - 24%	25.20%
Bahamas, The	12%-Standard 0%-Reduced	0%	0%	0%	0%	0%	17.60%
Barbados	17,5%	25%	28,5%	0%	15%	0%	29.40%
Belize	12,5%	25%	25%	0%	15%	0%	29.90%
British Virgin Islands (UK)	0%	0%	0%	0%	0%	0%	38.90%
Caribbean Netherlands (BES)	8%-Bonaire 7%-Saba and St. Eustatius	0%	35.40%	0%	15%	0%	
Cayman Islands (UK)	0%	0%	0%	0%	0%	0%	38,9%
Curaçao (Neth.)	6%-Standard 0%, 7% and 9% rates applicable	22%	46,5%	0%	0%	Up to 25%	16,6% (2012 est.)
Dominica	15% Reduced-0%, 15%	25%	35%	0%	Included in taxable income	0%	40,1%
Dominican Republic	18%	27%	25%	25% - 27%	10%	3%-inheritance / 27%-gift	12,7%
Grenada	15% 10%-hotel and dive 0%-reduced	28%	30%	0%	0%	0%	25,8%
Guyana	14%	45%	40%	20%	15%	0%	28%
Haiti	10%	30%	30%	15%	15%	Unknown	18,2%
Jamaica	16,5%	25%	30%	0%	15%	1,5% estate / 7,5% gift	27,7%
Puerto Rico (USA)	10,5%	37,5%	33%	15% / 25% non- residents	15%	18% - 50%	8,9%
St. Kitts and Nevis	17% 10%-tourism	33%	0%	0%	4% / 10% non- residents	0%	31,8%
St. Lucia	12,5% 10%-accommodation 0%-reduced	30%	30%	0%	0%	0%	23,6%
St. Vincent and the Grenadines	16% 10%-accommodation 0%-reduced	30%	32,5%	0%	0%	Unknown	28,7%
Suriname	10%-goods 8%-services 25%-luxury goods 0%-exempt	36%	38%	36%	25%	Unknown	16,4%
Trinidad and Tobago	12,5% 0%-reduced	30%	25%	0% - 30%	0% residents / 5% - 10% nonresidents	0%	23%
Turks and Caicos (UK)	11%	0%	8%	0%	0%	0%	24,2%

Kiko ta e retonan pa introduci un VAT/BTW?

E introduccion di *indirecte* belasting MESTER wordo acompaña cu un eliminacion di otro *belasting y/of invoerrechten* pa no subi costo di bida.

Tema C.1 di e *Landspakket* ta inclui 'ampliacion di base di impuesto, pasando di impuesto directo pa indirecto y introduciendo VAT/BBO di 12,5%, conforme proposicion di Fiscal Affairs Department (FAD) di IMF of ABB conforme sistema fiscal di Caribe Hulandes.'

Nan no ta delinea cua impuestonan lo wordo remplasa cu un BTW. Awor aki nos tin BBO, BAZV y BAVP cu ta conoci como un *general sales tax* (GST) y tur hunto ta igual na 6%. Eliminacion di BBO/BAZV/BAVP na favor di un BTW di 12,5% ta un medida mas. Nos ta para ariba cu ni pueblo ni comercio por carga mas medida y recorte nan mester bin den sector publico.

AHATA / ATIA tin un proposicion pa introduci un BTW di 10% a cambio di eliminacion di BBO, BAZV / BAVP, Tourism levy, Environmental levy (*bijzondere belasting verblijf*), car rental tax, gaming tax, import duties y *deviezen provisie*. Empresanan chikito cu entradanan bao di Afl. 84.000,- ta keda exclui di BTW, nan contribucion ta a traves di nan compras ya cu nan no lo pidi devolucion di BTW.

Nos lo kier combina loke ta acorda caba den e *landspakket* cu e proposicion di AHATA/ATIA y recomendacion di IMF pa p.e. exclui empresanan chikito cu entradanan te cu Afl. 70.000,-. AHATA/ATIA ta boga pa un solo tarifa di VAT, pero si nos kier evita pa su introduccion bira un medida e mester bin a cambio di eliminacion di tur *invoerrechten*.

E tarifa mediano di *invoerrechten* na Aruba ta 12% dus eliminando esey y BBO/BAZV/BAVP igual na 6% na favor di un sistema di 12,5% BTW lo representa un recorte den prijs pa consumidor y comercio. Awor como nos reforma ta inclui eliminacion di *invoerrechten* nos mester introduci mas cu un tarifa di BTW.

Lo siguiente lo wordo exclui di BTW:

huur of bende un propiedad (incluyendo transferencia di accion nan caminda un compania ta doño) cu ta mas cu dos año bieu cu un Arubano defini como un persona cu a nace na Aruba, tin un mayor naci na Aruba, tin dos of mas welo naci na Aruba of un persona cu tin por lo menos 12 año biba consecutivamente na Aruba.

- enseñasa
- servicionan medico
- actividadnan deportivo
- servicionan financiero y seguro
- cuidado di mucha
- servicionan di cuidado y cuidado na cas
- energia renobabel y productonan asocia
- *fundraising*

Asina nos lo introduci un tarifa standard di 12,5% BTW, loke ta exclui lo paga 0% BTW y lo tin un tercer tarifa di 25% BTW cu lo aplica ariba benta di auto por ehempel y otro productonan ariba cual tabata cobra un *invoerrechten* mas halto cu 25%. Turistanan lo por pidi pa debilbe BTW ariba compras manera ta e caso na otro paisnan, haciendo Aruba un berdadero freeport y yudando nos *retailers*.

REVERSE CHARGE BTW

Pa ensura cu e cambio den sistema ta husto pa tur competitor lo mester introduci un reverse charge BTW pa servicionan di companianan stranhero. Por ehempel no por permiti cu servicionan di p.e. accounting, consulting of legal stranhero ta mas competitivo paso nan no mester cobra BTW contrario na esnan local. Den casonan asina e comprador di e servicio lo mester paga un asina yama *reverse charge* BTW igual na 12,5%. Asina nos ta ensura un *level playing field* pa tur.

CORPORATE TAX / WINSTBELASTING

Pa keda competitivo nos lo mester reduci tanto belasting ariba empresanan y individuonan.

E tarifa standard ariba ganashi di empresa (*corporate tax / winstbelasting*) lo baha te cu 15% haciendo nos un di e paisnan mas competitivo den nos region. Nos ta comprometi cu finanzas responsabel asina ta cu mientras Aruba su Debe / PIB ta mas cu 100% lo tin un *public finances surtax* di 5% pa un maximo di dies aña. E recorte nan den ganashi di empresa lo bin den combinacion cu eliminacion di tur deducccion.

INCOME TAX / INKOMSTENBELASTING

E tarifa standard di *inkomstenbelasting / income tax* lo baha te cu 25% y aplica ariba tur entrada mas cu Afl. 25,000.- Tur persona ganando menos di Afl. 25,000.- pa aña lo ta exonera di paga belasting ariba nan entradanan. Nos ta comprometi cu finanzas responsabel asina ta cu mientras Aruba su Debe / PIB ta mas cu 100% lo tin un *public finances surtax* di 5% pa un

maximo di dies aña (esaki no lo aplica ariba entradanan bao di Afl.25,000.-).

TERRITORIAL BASED TAXATION

E recorte nan den *belasting* lo stimula nos economia cumpliendo cu un di e obhetivonan di e *Landspakket*. Un otro obhetivo ta un 'distribucion (mas) husto di entrada'. Aruba awor tin algun di e tarifanan di belasting mas halto na mundo cu un sistema hopi progresivo y e no a logra un distribucion mas husto. Turismo ta representa gran parti di nos economia y eynan hopi di e ganashinan no ta paga nan fair share di *belasting*. Pasando pa un sistema di *indirecte belasting* lo coregi parti di e problema pero pa siglo 21 nos mester implementa un di e modelonan mas exitoso na mundo.

Tanto Singapore como Hong Kong ta usa un sistema di *territorial based taxation*. Esey kier men cu nan ta cobra *belasting* ariba tur ganashi cu ta sosode na nan pais sin tene cuenta cu e domicilio di e persona of empresa. Anguilla cu ta e pais / teritorio den Caribe cu mas entrada ta haña di su sistema di *belasting* a caba di pasa un ley cu ta pasa pa un sistema teritorial di *belasting*.

E cambio aki lo nifi ca no solamente un distribucion mas husto di e entradanan cu ta wordo genera na Aruba pero tambe cumpli cu un otro obhetivo di e *Landspakket* cual ta 'realisacion di servicio di impuesto ekipa adecuadamente'. Servicio di Impuesto lo por mihor controla entradanan genera localmente cu bay purba implementa un sistema di

worldwide income taxation cu e no ta ekipa pa monitorea. Tambe nos lo kier empodera nos servicio di impuesto pa por *audit* tur structura legal incluyendo *stichting*.

Nos reforma fiscal ta cumpli cu e metanan di *Landspakket C.1* door di aumenta entrada a base di amplia nos *tax base* mientras nos ta haci e sistema mas robusto y senciyu. Atraves di un BTW nos lo hisa e entradanan di *belasting* relaciona cu sector informal pa nan tambe contribui na nos economia.

Introduccion di open data cu ta parti di nos reforma gubernamental, flexibilidad laboral y modernisacion di nos LMA ta cumpli cu 'medida destina pa reduci gasto fiscal y contribucion / transferencia na third parties substancialmente' (C.1).

Siguiendo e mesun seccion di e *Landspakket* lo 'limita interferencia administrativo / di autoridad discrecional tanto di ambtenaar como di director (p.l.t. deduccion, tax holiday)' door di prohibi esey. Nos lo tin algun di e tarifanan mas competitivo den region dus *tax holiday* lo no ta necesario.

Tocante punto 'C.4 a base di e investigacion existente y/of adicional, ta determina si por optimalisa y modernisa Servicio di Impuesto di manera cu cobramento di impuesto por tuma luga di manera eficaz y eficiente'. Mester sigui amplia e digitalisacion di nos servicio di impuesto y mester *haal in* e tardansa den pago. Lo ta importante pa haci un inventario realistico di cuanto hende realmente debe y cuanto ta cobransa erroneo automaticamente genera. Mester ekipa servicio di impuesto pa por bira mas dinamico ya cu introduccion di un BTW lo rekeri un

sistema mas agil caminda empresanan ta wordo debilbi nan BTW *refunds* dentro di 30 dia.

Punto C.5 di *Landspakket* 'ta cera un acuerdo di impuesto entre Hulanda, Aruba/Curaçao/Sint Maarten riba e mesun liña cu e condicionnan minimo di Base Erosion and Profit Shifting (BEPS) bou di cua e.o. ta paga tino pa preveni posibel transferencia di ganashi'. Aruba pasando pa un sistema di belasting teritorial lo cumpli cu e meta di C.5 pero no ta desconta lasonan mas estrecho entre e partners nan di Reino ariba asuntonan di impuesto.

NOS MONEDA NACIONAL?

Un moneda tin tres funcion:

- mecanismo di intercambio
- unidad di balor
- garantia di spaar

Ariba e tema di *Landspakket D.3*, nos ta kere cu Aruba no ta apto pa tin su mesun moneda y e gastonan di esey ta alrededor di Afl. 60-80 milyon pa aña na *deviezen provisie* so. Mirando e crisis social, e falta den enseñasa, e falta den nos sistema di cuidu etc. e ta un capricho cu no por sigui. E peliger di dolarisacion ta e inflacion cu a sosode na Bonaire y tambe na Hulanda dia nan a converti di florin pa euro. Esey no kier men cu no por dolarisa sin inflacion, bon organisa caminda comerciante nan mester entrega listanan di prijs actual na florin prome cu dolarisacion y listanan di prijs despues combina cu boet nan pisa cuminsando na Afl. 50,000.- pa cualkier aumento ta hacie posibel dolarisa sin perhudica pueblo.

Nos no kier simplemente adapta e dolar Americano como nos moneda nacional. Nos kier crea un sistema financiero mas global manera ta e caso na Channel Islands. Aunke ta premira cu lo usa dollar y/of euro pa intercambio, nos kier habri nos sistema financiero pa tur moneda incluyendo euro, british pound, yen etc. Pakiko no empodera nos ciudadanonan pa *spaar* den e moneda(nan) di nan escohencia. Esey tambe ta habri posibilidadnan pa personanan local haci negoshi rond mundo mas facilmente y mas economicamente. Tambe e lo habri e posibilidad pa desaroya un *mini-capital market* cu lo sirbi pa diversifica nos economia.

BANCO CENTRAL

Manera ta delinea den *Landspakket* Tema D.1 nos tambe lo kier wak un reevaluacion di Banco Central y su rol den nos economia. Ta importante pa mantene su independencia pero nos kier pa un inventario wordo haci pa wak con por mehora p.e. e representacion di banceronan cu experiencia den e *veld* pa e no ta domina simplemente pa academico y huristanan. E falta di experiencia practico tin consecucionan pa cu con e ta opera y esey por tin consecucionan negativo pa nos economia. Tambe nos lo kier wak limite di termino di 12 aña pa Director(a) y directiva di Banco Central.

Ariba e tema di C.3 y D.2, Aruba su sistema di compliance ta esun mas pisa den henter Caribe y e ta desfuncional. Pa un simpel transaccion di cumpra un cas un persona por tin mester di haci compliance cu su real-estate broker, abogado, notario y banco. Dus e mesun compliance cu

cuatro diferente instancia pa e mesun transaccion y despues Banco Central mester bay procesa tur. Esaki ta nifica un desperdicio di recurso, tempo y energia. Lo mester bin un evaluacion con e otro 28 pais y teritorionan den Caribe ta haci nan compliance y keda na bon cu OECD guidelines y CFATF. Tambe mester studia e posibilidad di innovacion tecnologico si lo por haci un compliance directamente cu un instancia y cu permiso di e persona e por wordo comparti cu otro pa no ripiti e proceso innecesariamente. Tambe por considera pa e compliance keda valido pa un periodo di 1-3 aña.

DEBE NACIONAL

E reto financiero mas grandi enfrentando nos pais ta e debe nacional. Banco Central di Aruba ta estima cu Real GDP a disminui 26,4% na 2020. Esey ta nifica cu nos debe nacional excluyendo obligacion nan financiero PPP lo ta entre 5.5-6 biyon pa fin di 2021, significando un *Debt/GDP ratio* di mas cu 136%. Si nos inclui e obligacion nan financiero di proyectonan PPP cu a aumenta danki na nos *credit downgrade* e ora nos debe ta entre 6.5-7 biyon pa fin di 2021.

E nivel di debe ta encera un posibel dos decada di austeridad nos dilanti caminda no lo tin un fondo pa crisis social, enseñansa, salubridad etc. Como minimo nos lo kier refinancia nos debe atraves di Hulanda na un interes mas abao. Tambe nos lo kier explora cooperacion mas estrecho cu Hulanda pa por lo menos e duracion di e *Landspakket* den cierto carteranan manera enseñansa y husticia. Lo investiga cua departamentonan lo ta mihor sirbi como parti di e respectivo

departamento Hulandes y si esey lo trece beneficio pa Aruba y alivio fiscal.

GARANTIA DI DEPOSITO (DGS)

Tocante punto D.4 di e *Landspakket* cu ta prescribi introduccion di un sistema di garantia di deposito (DGS) nos ta di opinion cu en principio esaki ta algo bon. Si nos tin preocupacion di con e lo wordo constela mirando e estado precario di finanzas publico. Nos no kier mira un situacion caminda su introduccion lo encera un aumento den prijs di servicionan financiero. Tambe nos kier señala si Banco Central ta haci su trabao e no lo ta necesario y simplemente representa un gasto mas pa consumidor di servicionan financiero.

ACCESO NA SISTEMA FINANCIERO

Un sistema financiero mas dinamico ta instrumental pa nos desaroyo y awor aki acceso na dje no ta suficiente facil y e proceso di habri un cuenta nobo ta tarda demasiado. Siguiendo e Directiva Europeo 2014/92/EU nos kier segura cu tur persona legalmente residencia na Aruba of cu un propiedad of negoshi na Aruba tin acceso na un cuenta di banco basico pa haci pago. Nos kier modifica e *vergunning* nan di banco pa hacie un obligacion brinda cada miembro di nos comunidad un cuenta basico.

Tambe nos kier haci e proceso di habri un cuenta mas rapido, esey kier men nos kier studia e posibilidad di exigí banconan habri un cuenta condicional pa tanto individuo como compania e mesun dia. E cuenta lo keda condicional cu limitenan mientras

e banco ta completa nan proceso di *screening* dentro di un tempo stipula p.e. no mas largo cu 30 dia. Awor aki mucho persona y compania ta wordo exclui di nos sistema financiero obligandonan di opera den e sector informal. Esey al final ta un peliger mas grandi no solamente pa nos sistema financiero pero tambe ta haci e trabao di nos servicio di impuesto mas complica. Ta imposibel reduci e tamaño di nos sector informal si nos no por brinda acceso na nos sistema financiero como garantia.

REVITALISA ECONOMIA

REFORMA ECONOMICO

Landspakket Tema E. ta trata reforma economico y tin como obhetivonan:

- realisa un economia dinamico y resiliente
- realisa un sistema di seguridad social solido y pagabel cu ta pone incentivo na e luga corecto

Na prome instante e dos obhetivonan aki por parce contradictorio pero un sistema di seguridad social solido ta un herament stabilisante pa un economia, te hasta si e por impedi e tamaño di su crecimiento.

FLEXIBILIDAD LABORAL

Flexibilidad laboral ta e prome cambio cu mester introduci pa haci nos economia mas dinamico. Den seccion E.1 di e *Landspakket* ta acorda cu lo bin 'un analisis integral di manejo di mercado laboral, legislacion y regulacion...'. E analisis lo inclui:

- Medida manera reduccion di ora di trabao
- Trabao part-time
- Contract temporal
- Suavisacion di derecho di kitamento for di trabao
- Eliminacion di obstaculo pa contrata trahado stranhero
- Empleo ilegal
- Lucha contra desempleo hubenil

Nos como partido sigur ta na favor di flexibilidad laboral y tambe nos ta pensa cu e mester ta combina cu un Arbo-Wet pa

garantisa seguridad di e trahador y tambe un modernisacion di e LMA pa tin menos discrepancia entre sector priva y sector publico. Obviamente modernisacion di e LMA mester inclui mas flexibilidad den salarionan pa cu sector publico. No ta husto of competitivo pa un docente yega su salario maximo na 38 año por ehempel.

Mas flexibilidad laboral ta hopi importante pa empodera e trahador pa participa den mercado laboral a base di su necesidad y disposicion, pa mamanan esaki lo haci acceso na trabao mas facil. Na Spanje nan ta haciendo un programa piloto cu a implementa un siman laboral di cuatro dia y ta studiando ki efectonan e tin ariba tanto e trahador, su bienestar y tambe productividad. Esaki ta un herament cu nos lo por utiliza pa suavisa e recortenan ya caba acorda pa cu gastonan di personal den sector publico y tambe nos mester considera un siman laboral di 35 ora.

Nos ta kere den e trahador Arubano, nan talento y dedicacion pa cu nan trabao kier men suavizacion di derecho di kitamento di trabao ta algo cu no mester preocupa ningun hende. Productividad di e trahador ta e base ariba cual nos economia ta funciona y determina nos competitividad como pais. E relacion entre un dunador di trabao y e trahador ta uno basa ariba necesidad mutuo. Ora e relacion aki no ta funciona kier men tin un mihor trabao pa e trahador y tambe un mihor empleado pa e dunador di trabao. Suavisa e proceso pa cada uno ta den e combinacion optimal lo beneficia no solamente nos economia pero tambe e individuonan.

CONTRATA TRAHADOR STRANHERO

'Eliminacion di obstaculo pa contrata trahado stranhero' (E.1) ta algo cu nos ta pensa por ta contra-productivo. Ta sumamente importante pa nos proteha nos mercado laboral local pero na mesun momento mester mehora e procesamiento di DIMAS pa ora no tin un local pa ocupa un posicion. E otorgamento di permiso pa stranhero mester ta liga cu e situacion actual di nos mercado laboral. Na un momento cu tin mas cu 13,000 Arubano sin trabao y mas cu 24,000 famia ricibiendo ayudo alimentario no tin espacio pa admiti stranhero cu ta competi cu local pa e mesun trabao.

Nos como pais no ta cla pa *freedom of movement* di trahador ni dentro di Reino y sigur no cu Union Europeo ainda. E discrepancia entre nivelnan di educacion y tambe productividad kier men cu nos mester inverti den e talento di nos localnan prome.

PERSONANAN INDOCUMENTA

E.2/E.3 Empleo di personanan indocumenta ta un problema grandi na Aruba. E personanan aki hopi biaha ta nos bisiña, nan yuinan a lanta aki y nos ta kere cu hopi ta forma un parti integral di nos comunidad. Awor aki hopi ta traha sin contribui na nos economia pasobra nan ta mas tanto den economia informal. Esaki ta un peliger pa e trahado Arubano ya cu e gastonan relaciona cu emplea un persona indocumenta ta hopi mas abao. Nos ta kere cu pa combati empleo ilegal mester regularisa gran parti di esnan indocumenta y na mesun momento

introduci castigonan mas pisa pa dunadornan di trabao cu ta emplea nan manera boet di p.e. Afl. 50.000,-.

REFUGIADONAN

Semper mester tene cuenta cu nos balornan di yuda nos bisiña y mester reconoce cu e necesidad na nos pais bisiña Venezuela a causa un crisis humanitario cual ta afectando nos den hopi sector. Nos ta na favor di un sistema humanitario pa trata esnan cu ta pasando necesidad pero sin cu esey ta crea necesidad pa nos mesun poblacion. Nos mester establece convenio cu otro paisnan manera Canada, Australia, Merca y paisnan Europeo pa acepta sikiera parti di e poblacion di refugiado actualmente na Aruba paso nos no tin e capacidad di absorbe tur.

Ta estima cu tin mas o menos 17,000 refugiado Venezolano na Aruba y ainda no tin un registracion di nan cu ta preveni cu nos por pidi fondo di ayudo di UNHCR y otro instancianan internacional pa cu nan cuido. Aruba tin obligacion bao di e Convencion di Ginebra pa cu refugiado pero nos no tin e conocimiento ni e recursonan pa procesa e aplicacion nan di asilo y tampoco e infraestructura pa carga e cantidad di persona cu ta akinan. Un inventario lo ta necesario pa establece cuanto nan ta, bao di ki condicion nan ta biba y ki talento nan por tin pa cu nos economia. Mirando cu nos ta un isla chikito caminda desaroyo ya caba a destrui 90% di nos naturalesa, comunidad internacional mester reconoce cu tin limite pa cu nos capacidad pa acepta refugiado.

SEGURIDAD SOCIAL

Seccion E.4 di e *Landspakket* ta papia di 'garantisa cu e sistema di seguridad social lo tin un funcion di activacion, cu e incentivanan adecuado, garantizando na mes momento un red di seguridad social adecuado'. Nos ta comprometi na e principio di no laga ningun hende atras y brinda cu recursonan suficiente nos kier mira gobierno den futuro garantisa e sobrevivencia basico di tur ciudadano a traves di un *universal basic income*.

E realidad ta cu nos no a yega e momento ey ainda caminda Aruba tin e fondo y recursonan pa garantisa un sistema di seguridad social adecuado pa tur hende. Aki nos ta bolbe na e metanan contradictorio di Tema E. Reforma economico, como partido Liberal Progresista nos ta kere den empodera tur ciudadano cu e hermentnan necesario pa nan crea recurso. Nos no ta kere cu ta rol di gobierno crea recurso a base di mas medida cu nos pueblo y economia no por carga paso esey ta un caminda pa destruccion di nos pais.

Si nos ta reconoce cu pa 2030 inteligencia artificial lo surpasa inteligencia humano y esey hunto cu automatizacion kier men cu pa 2050 ya mitar di nos trabaonan no lo existi. E modelo den cual un individuo mester un trabao pa biba y cuida pa su famia no ta bai sobrevivi e siglo aki. Nos ta kere cu ta importante pa cuminsa pone e fundeshi pa e realidad ey desde awor. Nos meta a largo plazo a traves di un *universal basic income* ta garantisa e existencia basico di tur Arubano pa 2050. Adelanta e realidad ey mientras pais Aruba no tin entrada suficiente pa cu esey lo encera condena e nacion Arubano pa historia dus nos tin preocupacion grandi pa cu seccion E.4 di e *Landspakket*.

REFORMA SOCIAL

Nos plan pa reforma fiscal lo sanea finanzas publico y crea un economia mas dinamico y lo forma e fundeshi pa nos revitalisacion economico. Siguiendo e ehempel di Singapore nos kier simplifica e sistema di lanta un negoshi y ofrece mas sosten pa emprendedornan.

Nos kier introduci un *one-stop shop* caminda por haci lo siguiente:

- Registra un negoshi (Kamer van Koophandel en Nijverheid)
- Copyright, Patent y/of Trademark por ehempel e nomber, marca etc (Bureau Intellectuele Eigendom)
- Registra cu y ricibi un persoons nr (Servicio di Impuesto), nos ta kere den standardisa e persoons nr y number di registro na KvK pa ta mescos
- Aplica pa y ser informa di cualkier permiso of licencia necesario pa opera e negoshi (Directie Economische Zaken, Handel en Industrie DEZHI).
- Aplica pa y ser informa di cualkier permiso necesario pa cu e impacto na medio ambiente (Directie Natuur en Milieu DNM)
- Aplica pa y ser informa di cualkier permiso necesario pa construccion comercial (Dienst Openbare Werken Aruba DOW)
- Conecta cu mercado laboral (Departamento di Labor DPL y/ of Departamento di Integracion, Maneho y Administracion di Stranhero DIMAS)
- Conecta cu sector financiero (banco, seguro, micro-finance etc.)

- Conecta cu asociacion y gremionan comercial p.e. AHATA, ATIA, Comerciante Uni
- Conecta cu comunidad atraves di p.e. Centro di Barion(nan) concerni

Nos kier diminui obstaculonan pa cu nos crecimiento economico y esey ta sigura eliminacion di redtape teniendo na cuenta semper nos comunidad, medio ambiente y durabilidad.

Nos no por core prome cu nos cuminsa cana

PRODUCTIVIDAD SECTOR PUBLICO

Ta importante pa nos no solamente centralisa y standardisa e procesonan relaciona cu comercio pero tambe pa nos garantiza un nivel minimo di productividad di parti sector publico.

Atraves di digitalisacion, entrenamiento y modernisacion di procesonan nos kier yega na un punto cu tur permiso ta wordo tramita dentro di 30 dia. Nos kier ofrece e garantia cu si den 90 dia un peticion no a wordo tramita e ta keda automaticamente aproba poniendo e responsabilidad den man di sector publico pa funciona di un manera constructivo pa cu nos economia.

ARUBA SMALL BUSINESS ASSOCIATION

Nos kier introduci un instancia parecido na Small Business Association na Merca

pa asisti nos emprendedornan alcanza nan soño di cuminsa nan mesun negoshi. E departamento lo por yuda cu business plan, feasibility studies, financiamiento y otro recursonan pa e sector aki crece.

TURISMO

Customer experience is the new brand

Mirando e importancia di turismo pa cu nos economia, ta importante pa nos keda e destinacion preferi den Caribe pa repeat visitors. Aki nan nos ta mira lo siguiente retonan:

- Ofrece un producto mas autentico cu ta diferencia Aruba di otro destinonan
- Conserva y mehora e calidad di nos producto
- Preserva nos naturalesa cu ta e motibo principal pakico nos bishitante nan ta bin Aruba

BE LOCAL

Pa ofrece un producto mas autentico ta importante pa no solamente conecta e bishitante cu nos comunidad pero tambe promove nos arte, cultura, y identidad. Nos lo kier mira e desaroyo di un plataforma pa conecta nos bishitantenan cu un oportunidad pa sea duna back na comunidad of comparti den un actividad local. Como parti di Aruba su mercadeo por promove esaki di antemano dunando mas tempo pa enrikece e experiencia. Ehempelnan di con por conecta nos pueblo cu turistanan ta inclui:

Lesnan di cushina local, atraves di ATA of otro instancia por p.e. inverti den e cushina di localnan pa por acomoda

gruponan di menos di dies persona pa un les di prepara cuminda local. Esaki por sirbi como un extra entrada pa e localnan y un experiencia unico pa e turista. E conexion lo duna Aruba un toke personal cu e bishitante a base di cual amistadnan por forma. Comunicacion ariba rednan social por brinda un *brug* no solamente pa e bishitante bolbe pero tambe pa nan sinti nan mes involvi den nos comunidad durante nan ausencia.

Personanan cu ta coach un ekipo deportivo na nan pais di origen por wordo conecta cu clubnan deportivo local. Personanan cu ta traha den un industria specifico por wordo conecta cu comerciante y companianan local. Personanan involvi cu rescata mascotanan por wordo conecta cu animal shelters local. Personanan interesa den agricultura por pasa un dia como voluntario cu un cunucero of cu un persona practicando perma-cultura. Otro personanan lo kier simplemente duna bek den forma parti di un beach cleanup por ehempel. E posibilidadnan pa conecta nos bishitante cu un experiencia local ta hopi y experiencia ta muestra cu duna bek den un forma activo na bo destinacion ta laga un mihor experiencia atras.

CULTURAL AND CREATIVE INDUSTRIES

Fuera di haci nos bishitantenan berdadero stakeholders den nos comunidad nos mester por ofrece mas oportunidad pa nan experiencia nos cultura. Nos tin un sector creativo florecente y nan merece nan debido atencion di tanto nos gobierno, comunidad y tambe nos bishitantenan. *Cultural and Creative Industries* ta untapped potential pa cu nos

economia y nos lo kier mira mas atencion y recurso dedica na su desaroyo paso e ta un herment importante pa fortifica nos identidad y tambe haci nos producto turistico mas autentico.

Nos lo kier implementa un plan piloto caminda gobierno ta cuminsa pa subsidia 40 artista pa produci un cierto cantidad di obra, cantica etc pa aña. E obra nan aki lo bira patrimonio nacional y por wordo *verhuur* cu companianan local na un prijs hopi barata. E modelo aki por sigui wordo extendi y por yega na ta *zelfstandig*. E asina conoci *orange economy* ta algo cu nos ta kere por desaroya cu consecuencianan positivo pa cu nos economia, sociedad y turismo.

CALIDAD

Pa conserva y mehora e calidad di nos producto nos mester crea incentivo y reglamento nan pa baha e cantidad di camber di hotel, no duna mas permiso pa all-inclusive y respeta e moratorium ariba construccion di mas hotel. Awor aki tin 5000-7000 camber mas aproba cu no a ni cuminsa construccion y mester cuminsa pone fondo un banda pa e gastonan encera cu cancela e proyecto nan aki of restringi nan pa pariba di *brug*. Tur construccion nobo despues di St. Regis mester ta limita na boutique hotels di menos di 150 camber y/of pariba di *brug*. Mester encurasha hotelnan ora nan renoba pa reduci e cantidad di camber y converti esnan existente den suites pa hisa e calidad di nos turismo. Esey lo nifica un enfoke ariba e calidad y no cantidad di bishitante cu ta yega nos isla.

MEDIO AMBIENTE

Pa salvaguardia nos medio ambiente nos mester considera keda sin renoba permiso di *erfpacht* ariba terenonan di hotelnan a menos nan ta cumpli cu nos vision nobo di enfoca ariba calidad y no cantidad. Den e area di Palm Beach nos mester eherce curashi y cuminsa prepara pa un futuro cu aki 20-30 aña ta prepara pa tumba algun di e hotelnan y regresa e terreno a naturalesa. Ampliacion di e parke maritimo y inclui e den Parke Nacional Aruba lo por trece mihor maneho ariba cuida di nos medio ambiente. Mester regula e cantidad di operadornan den nos territorio pa asina e destruccion di naturalesa no sigui paso ya caba 90% a desaparece.

Nos ta kere cu mester bin un suspension di otorgamento di tereno y DIP den combinacion cu FCCA mester cuminsa enfoca ariba desaroyo residencial nobo den centro di Oranjestad y San Nicolas pa rebiba nos centronan urbano. E ROPV mester pasa y wordo adapta pa inclui mas *mixed use buildings* cu ground floor pa retail, prome piso pa oficina y e pisonan mas halto pa residencia. Un edificio por tin oficina ariba un piso mas halto unicamente si e ta completamente di oficina por ehempel.

SAN NICOLAS

Siglo 21 ta e siglo di San Nicolas. Nos ta kere den regresa e ciudad aki pa bolbe ta e centro di comercio di nos isla. Aunke nos kier mira desaroyo, nos kier hacie mas cuidadosamente di un forma cu nos ta enfoca ariba un cas pa local y no un *speeltu*in pa turista. Nos infraestructura

y desaroyo mester refleha nos identidad como nacion y no e perspectiva di kiko un bishitante lo spera.

San Nicolas ya caba tin un deep water port y hopi tereno dilanti lama cu antes tabata refineria. Aunke nos lo duna e compania existente tur espacio y apoyo pa logra reapertura di e refineria nos ta kere cu ta mas probabel cu ta un wega politico y cu e lo no ta exitoso y tampoco trece beneficio mirando e sobrecapacidad den mundo petrolero y e disminucion den produci energia a traves di *fossil fuels*.

SAN NICOLAS PORT AUTHORITY

Lo ta un prioridad pa nos partido hunto cu un inventario di ki contaminacion ta existi ariba e tereno di refineria, cuanto lo costa pa sana y ki balor di *scrap metal* tin eyan. Nos mester percura cu e infraestructura existente operacional, p.e. e finger pier caminda combustibel ta wordo descarga, ta cumpli cu e minimo *health and safety standards*. Renobacion di e infraestructura di e puerto ta un proyecto apoya pa e prestigioso San Nicolas Business Association.

E plan pa San Nicolas Port Authority mester ta pa un desaroyo multi-funcional cu no solamente ta preserva su actividadnan actual pero tambe expande. Inclui den San Nicolas Port Authority nos ta premira tambe un upgrade pa facilita yegada di cruise ships asina ofreciendo un alternativa no solamente pa desembarca combustibel pero tambe turismo.

REFINERIA

Pa cu e futuro di e tereno di refineria nos kier mira e desaroyo di un centro urbano nobo cu e infraestructura mas moderno existente. Nos ta premira un centro urbano modela tras di Amsterdam Centrum cu canal y edificionan te cu 8 piso. E desaroyo di e centro urbano nobo mester inclui e poblacion local, tur edificio residencial mester reserva 20-30% di su viviendanan pa low-income housing pa e pueblo di San Nicolas. Como parti di e desaroyo di e ciudad nobo nos lo kier invita universidad(nan) internacional pa establece y haci San Nicolas un studentenstad. Asina nos por expande facultadnan ofreci na Aruba y beneficia di convenionan ya existente cu universidadnan na tanto Merca como Europa.

Esencial pa e infraestructura nobo di **San Nicolas Central Business District (SNCBD)** ta un fiber optic network ofreciendo 2 Gigabyte download speeds y 1 Gigabyte upload speeds manera Google Fiber ta ofrece na diferente ciudad di Merca. A base di loke lo ta e broadband network mas rapido di nos region y henter Latino America ta habri tur sorto di oportunidad pa diversifica nos economia y un plataforma confiabel pa conecta talentolocalcumundohentercomocliente prospectivo. E network lo habri porta pa industrianan di futuro cu aplicacion pa cu fabricacion, comunicacion, salubridad, transporte y mas. Algun industria cu nos lo kier mira desaroya na SNCBD ta:

- Advanced Life Sciences and Technology incluyendo stem cell research usando cells di bo cuero, algo cu ta sosdiendo caba na Cayman Islands
- Data Processing
- Financial Technology (Fintech)

E infraestructura tecnologico moderno y reforma fiscal lo habri porta pa companianan di media, digital nomads y otronan considera Aruba como un base diversificando nos economia. Tambe nos kier considera e fabricacion di generic pharmaceuticals cu no ta rekeri labor intensivo cu potencial pa export como nos lo por certifica nan bao di normanan Europeo dunando un bentaha den mercado internacional.

Con nos ta financie?

Nos a habri conversacion caba cu varios *sovereign wealth funds*, *private equity groups* y otro inversionistanan. E diferente *sovereign wealth funds* tin diferente mandato cu ta inclui geografico y tambe pa industria. Caribe no ta representa debidamente pa falta di proyectonan di inversion atractivo y tambe otro mandato ta pa diversifica di *fossil fuels* dus nos ta convenci cu e potencial pa atrae un di e fondonan pa desaroya SNCBD ta halto y nos lo traha incansablemente pa haci e vision un realidad.

CANNABIS

Nos ta para pa legalizacion di tanto cannabis medicinal como recreacional pero mester crea e infraestructura optimal pa salvaguardia nos pueblo y saca bentaha maximo di e industria.

Despues di legalizacion di cannabis recreacional na Colorado, accidentnan di trafico den cual conductornan a test positivo pa cannabis a subi 109%. Estudionan di Merca ta muestra cu e cantidad di suicidio a baha despues di legalizacion y tambe e alivio pa personanan cu malesa cronico a resulta beneficioso paso nan por a keda sin

tuma remedi mas peligroso den forma di trankilisante y pa dolor. Di otro banda uso excesivo a hisa incidencia di depresion, schizophrenia y tambe por causa daño cognitivo si consumi regularmente desde un edad hoben.

Pa implementa legalisacion di cannabis recreacional mester tuma e retonan aki den cuenta. Nos lo kier introduci e concepto di *coffee shops* manera ta e caso na Hulanda pero cu mihor control. Personanan lo mester tin minimo 18 aña di edad pa ser admiti y nan identificacion mester keda scanned y controla pa un sistema cu ta link tur *coffee shops* hunto pa preveni cu nan ta bishita mas cu tres biaha pa siman. Tambe pa wordo admiti e personanan lo mester proba cu nan a bin den transporte publico y tin un ticket pa nan regreso. Personanan cu a bin cu nan propio vehiculo no por wordo admiti.

CUNUCERO

Nos lo limita *vergunning* pa *coffee shops* pa caya grandi Oranjestad y San Nicolas. *Coffee shops* no lo wordo permiti na ningun otro localidad. Tur cannabis cu wordo bendi den e *coffee shops* mester ta produci localmente, introduccion di esaki por ta gradual te ora produccion ta suficiente. Atraves di Santa Rosa lo kier conecta nos cunuceronan cu e *coffee shops* pa nan por produci cannabis. Departamento di Agricultura, Cria y Pesca tambe lo saca *guidelines* pa e cultivo di cannabis, preveniendo cu atraves di p.e. fertilizante lo crea variacion nan cu ta ofrece un experiencia no desea of mucho mas intenso cu e mata natural. Lo percura pa e cannabis ta den su forma mas natural

posibel usando solamente fertilizantenan natural.

Lo ta prohibi pa sali for di e *coffee shop* cu mas di 25 gram di cannabis y cualkier persona gara rebendiendo of kibrando e reglanan lo ta exclui di tanto e *coffee shops* y e industria pa un periodo minimo di dos aña.

SANTA ROSA

Gobierno lo percura pa e comercio di cannabis tin aceso na sector financiero pa acepta y haci pago door di Santa Rosa pero sin e posibilidad di otorga prestamo. E departamento lo cobra *fees* minimo mescos cu un banco commercial. Ta premira cu tur entrada di belasting genera atraves di e cultivo y consumo di Cannabis lo bay directamente pa Santa Rosa pa asina e por empodera nos cunuceronan pa realiza nos vision pa Sector Primario. Legalisacion recreacional mester wordo acompaña cu mihor educacion na scolnan pa conscientisa hoben nan pa cu e peligro di consumo y tambe mas inversion den facilidadnan di rehabilitacion y tambe mas *half-way house*.

SECTOR PRIMARIO

E pandemia a muestra e necesidad pa un nivel di produccion strategico di alimento. Nos ta kere den empodera Santa Rosa pa facilita esey den combinacion cu Bonaire y Curaçao. Un plan strategico inter-insular pa produci cria di bestia na Bonaire cu tin hopi tereno, plantamento di mata cu mester bay den tera na Curaçao y na Aruba enfoca ariba loke por produci a traves di hydroponics. E respectivo departamentonan di agricultura, cria y pesca lo coordina cu nan cunuceronan local pa asina formula un plan di produccion cu ta garantiza un minimo nivel di alimento pa e poblacion di e islanan ABC. Entre e tres islanan lo por comparti un vee dierenarts y e tres gobiernonan lo por inverti den un catamaran pa transporta e carga entre e islanan.

Na Aruba mester facilita un laboratorio pa por controla e calidad di awa di dam pa wak si e por wordo usa den agricultura paso e ta sigui ta mas barata cu awa di WEB Afl. 3,50 vs 5,50. Mester bin reglamentonan mas severo pa salvaguardia cu nos damnan no lo contamina y exige di tur construccion nobo instala un regenbak pa colecta awa cu nan por sea usa den nan cura of bende cu cunuceronan pa un prijs mas barata cu WEB. E produccion di productonan di agricultura local lo fortalece nos turismo y ofrece mas posibilidad pa *farm to table* den restaurant. Nos no ta kere den restringui importacion paso esey lo nifica prijs mas halto pa consumidor pero si mester garantiza un nivel di produccion strategico.

INNOVACION

Aruba lo lobby nos partners nan den Reino pa introduci un startup visa manera ta e caso na Chile pa atrae talento y sigura innovacion.

Tambe nos lo kier implementa un solo identificacion digital pa facilita digitalisacion.

Cu desaroyo di un sistema di fiber optic broadband 2G nos kier incentiva ofrece low bandwidth internet pa tur hogar na Aruba gratis.

#VOTAPAACCION  **21**

MODERNISACION GUBERNAMENTAL

Nos ideologia ta Liberal Progresivo y esaki kiermen cu nos ta kere den un responsabilidad comparti entre gobierno y cada ciudadano di pais Aruba. Nos ta kere cu pa stimula nos responsabilidad comparti mester introduci un sistema mas transparente. Asina pueblo por haya tur informacion na su disposicion facilmente y di e forma aki por cuminsa na restaura e confiansa den nos parlamento, gobernacion y gobernantenan.

Un gran parti di nos leyman principal y nos constitucion no a keda modernisa y adapta pa por refleha un comunidad di Siglo 21. Repasando nos leyman nos por a constata cu nos leyman actual no ta ofrece e proteccion necesario pero tampoco brinda e oportunidadnan cu cada ciudadano di Aruba merece. E landspakket cu a keda acorda cu Hulanda lo brinda un guia y plataforma pa entre otro e modernisacion y fortificacion di nos institucionan, y tambe lo delinea e creacion di un plan integral atraves di reformanan necesario pa por logra esaki.

Siguientemente nos vision ta inclui desaroyo di un gobierno sostenibel, responsabel y confiabel, den cual cada ciudadano por deposita su confiansa. Un gobierno confiabel ta brinda un base solido pa crecimiento economico, un gobierno confiabel ta uno cu semper lo percura pa tin mas igualdad y un gobierno

confiabel ta uno cu lo garantiza finanzas responsabel y balansa.

Finalmente nos lo pone enfoca ariba e aparato gubernamental y nos insitutonan conseho supremo¹, unda cu nos meta pa aumenta eficiencia y transparencia lo ta un factor indispensable. Tambe e lo ta un prioridad pa eleva e productividad di sector publico. Nos ta comprometi na stimula e Metanan di Desaroyo Sostenibel (SDG) di Nacionnan Uni, den e caso aki particularmente meta number 16², cu ta subraya ta pa stimula cooperacion fortificacion di nos. E punto di salida comun ta modernisacion di nos leyman. Nos vision ta pa crea un sociedad resistente na corrupcion.

Tur nos planes siguientemente lo ser elabora den mas detaye y ta ser basa ariba e Principionan di Bon Gobernacion manera defini pa Consejo di Europa³ y conforme e Landspakket acorda cu Hulanda, particularmente seccion B cu ta cubri e eficacia di e sector publico. E siguiente documento ta reparti den tres seccion, cada un delineando puntonan di accion pa por logra e metanan proponi.

- 1. Un Sistema Democratico pa Siglo 21**
- 2. Un Gobierno Sostenibel, Responsabel y Confiabel**
- 3. Un Aparato Publico Modernisa, Eficiente y Transparente**

1 https://secure.overheid.aw/bestuur-organisatie/vaste-colleges-van-advies_3377/

2 <https://www.un.org/sustainabledevelopment/peace-justice/>

3 <https://www.coe.int/en/web/good-governance/12-principles>

UN SISTEMA DEMOCRATICO PA SIGLO 21

E seccion aki lo wordo reparti den dos seccion unda lo cubri modernisacion, adaptacion y introduccion di cierto leyman y procesonan den Gobierno y Parlamento.

GOBIERNO

Fiha nos LIM pa un Periodo Defini (Landsverordening Instelling Ministeries)

Pa evita cu e constelacion di ministerionan ta ser ahusta cada cuatro aña, nos ta propone pa mantene e constelacion di ministerionan pa un periodo di cada bes 12 aña, pa di e forma aki por percura cu tin un miho bista y control di e cartenan/ departamentonan cu mester traha cu otro y cu ta cay bou ministerionan. Esaki lo juda optimalisa e eficiencia di gobierno. Ademas, di e forma aki Parlamento lo por hasi un analisis cada 8 aña pa determina cua cambionan of adaptacionan lo mester haci pa mehora eficiencia.

Nombracion di Minister

E meta di esaki ta pa por trece un balansa entre vision politico cu profesionalismo y obhetividad den nos gobierno. Lo introduci *functieomschrijvingen*, *opleidingsvereisten* y *niveaureisten* cu lo por keda añañadi den e LIM, despues partidonan politico ta draag voor nan candidatonan y Parlamento lo ta esun cu na final ta dicidi. Esaki ta haciele un poco mas dificil pa por nombra personanan no studia den posicionan clave pa dirigi nos pais.

Limite di Termino pa Minister y Parlamentario

Nos ta kere den renobacion di politica y pa e motibo ey nos ta boga pa un adaptacion di Ley unda lo limita un

Minister y Parlamentario na un termino maximo di 8 aña. Esaki lo pa percura cu tin un renobacion continuo den nos politica pero primordialmente lo garantisa modernisacion politico pa nos Pais.

Limite di Termino di Ministers y introduci Secretario di Estado (Staatssecretaris)

Accion21 no ta kere den amplia e cantidad di Ministerionan, pero si den e posibilidad di institui e funcion di Staatssecretaris pa por reparti e responsabilidad di carteranan ministerial mas grandi pa asina por brinda e atencion debido na cada ministerio.

Esaki lo juda reduci e fenomeno di consultants y contractanten. E beneficio di un Staatssecretaris en bes di un consultant/ contractant ta cu e Staatssecretaris lo fungi bou di un Minister y tambe por participa (sin derecho di voto) na reunionan di Ministerraad, y ala ves mester duna cuenta na Parlamento. Un Secretario di Estado ta lo wordo apunta y retira door di Parlamento. Nos Constitucion ja caba ta menciona e posicion aki, pues e lo mester keda constitucionalisa por medio di un landsverordening. Nos por sigui ehempel di Korsou cu ja tin esaki incorpora den su constitucion. E intencion lo ta pa introduci mas cu cuater (4) Secretario di Estado y tin un maximo di cinco (5) Minister.

Introduci un Maximo di Personal na Oficina di Minister

Accion21 ta boga pa servicionan di gobierno centralisa, manera por ehempel e uso y fortificacion di BUVO, DIA of DWJZ. Nos lo desea di minimalisa e uso di expertonan externo na e momentonan aki cu ta un costo grandi pa Pais Aruba. Un Minister tin ya caba diferente departamento completo na su discrecion cu lo por juda implementa manehonan pa progreso di Aruba. Pesey

introduci un ley cu ta den e LIM cu ta splica e candidat maximo cu un minister mester tin den su ekipo ta necesario. No mas cu 10 persona cu lo por yuda asisti e Minister den su function diario incluyendo e Staatssecretaris lo ta recomendabel.

Adapta Pensioen di Ministernan y Parlamentarionan

Limita e pensioen di Ministernan y Parlamentarionan na un maximo di un solo pensioen y lo considera esun mas halto, pa di e forma aki reduci gastonan publico. Ademas cambia e structura unda cu Parlamentarionan por logra haya un pensioen completo despues di 12 anja of di Ministernan despues di 8 anja. E pensioen mester ta mara segun leyman igual di cada ciudadano cu tin un trayectoria pa cana pa por logra spaar su pensioen.

PARLAMENTO

Adaptacion di Overbruggingstoelage

Adaptacion di e “Landsverordining Politieke Ambtsdragers” ta necesario pa asina percura cu nos Parlamentarionan y Ministernan mes por spaar un suma di nan salario mensualmente pa por cubri un cierto cantidad di luna despues cu nan bandona nan funcion. Di e forma aki nos ta reduci e gastonan publico cada cuater año y libera fondo cu lo por keda inverti den otro prioridadnan di nos Pais.

Finalisa y Implementa Independisacion di Parlamento

Mientras cu den nos constitucion nos Parlamento ta e organo di mas halto di nos Paiscuta representa nos ciudadanonanytin como tarea principal pa controla gobierno, e ta un organo cu financieramente ta depende di Gobierno pa e fondonan pa e por funciona. Actualmente e fondonan pa

e funcionamiento di Parlamento ta resorta boudi Minister di Asuntonan General. Pa por crea un organo realmente independiente, mester separa e dependencia financiero aki for di Gobierno y tambe unda cu Parlamento mes por dicidi ken e ta tuma den servicio. E mester bira un prioridad. E independisacion tambe ta duna Parlamento e autoridad pa por contrata mas persona den servicio pa asina traha mas eficaz y eficiente, manera por ehempel agrega mas Wetgevingsjuristen pa yuda Parlamentarionan cu e productonan di ley cu mester keda introduci y trata.

Reduci e cantidad di Parlamentario y Introduci un Presidente Independiente

Actualmente nos tin 21 Parlamentario. Accion 21 ta kere cu nos Parlamento lo por opera eficientemente cu 17 Parlamentario mas un Presidente di Parlamento Independiente y sin derecho di voto. E Presidente di Parlamento lo keda apunta pa 4 año y lo por solamente haya un extension di un termino mas di 4 año. Ademas lo apunta un Vice-Presidente cu lo keda escogi for di e 17 Parlamentarionan. E cantidad di 17 ta basa riba e promedio di Hulanda mirando e cantidad di representante den Eerste y Tweede Kamer relata na e cantidad di ciudadano na Hulanda.

E meta primordial di reduci e cantidad di Parlamentario ta pa por libera fondo pa asina por ekipa Parlamento cu e profesionalisacion necesario. Por ehempel na hulanda actualmente tin dos persona den servicio di cada Parlamentario pa asina por funciona y traha riba concepto y proyectonan di ley.

Alocacion mas Democratico di e Restzetel

Accion21 ta kere den fortificacion di nos estado di democracia. Pa e motibo aki nos ta sinti cu mester tin miho representacion di e boluntad di pueblo. Nos kier añañadi den Articulo 92 di nos Kiesverordening cu tur partido politico ta haya acceso na e restzetel no obstante si como partido a logra saca un asiento of no. Despues di e partido(nan) cu a saca un asiento, e partido cu ta mas serca di haya e asiento, automaticamente lo ta e Partido cu lo haya e asiento otorga.

Amplia Derecho di Voto pa Arubiano den Exterior

Apesar di e reparticion di Asiento tambe nos ta haya importante pa amplia e personanan cu tin e derecho di voto. Pa por ta elegible lo pone sierto condicionan basa riba lo siguiente:

- E candidat di aña cu bo persona a biba na Aruba
- Si bo a forma parti anteriormente di un eleccion
- Naci na Aruba
- Solamente Accesibel pa Reino Hulandes
- Bo lo mester a sikiera vota minimo 1 biaha na Aruba
- Of cu bo tabatatin 18 aña y bo por a ejerce bo derecho di voto si tabatatin eleccion

E punto aki principalmente lo empodera studiantenan den exterior cu mayoria biaha lo kier regresa Aruba pero no tin un bos pa con pa dirigi na Pais.

Adapta e Presupuesto pa voto separadamente pa Ministerio en bes di un totalidad

Re-introduci cu Parlamentarionan por haci uso di nan derecho di presupuesto pa vota riba cada ministerio independientemente. Beneficio lo ta:

- Minsternan cu nan presupuesto no tabata bon mester a haci ajustacionan
- Tin mas control riba unda e fondonan ta bay
- Por percura cu fondo ta bay realmente designa pa yuda pueblo y den bienestar general

Adapta con ta controla Cuentanan Anual y Presupuesto di Pais Aruba

Percura cu tin un estructura cu Parlamento por discuti riba e cuentanan annual pa controla si berdaderamente e Minister a cunpli cu locual e la presupuesta y brinda espacio na Parlamento pa e por controla y si tin algo cu no ta cuadra haci uso di su mocion di desconfiansa pa retira e minister si e no a cunpli. Esaki lo percura cu tin mas control den e forma con fondonan a keda aloca.

Introduccion di un Referendum Consultativo

Como un Partido Liberal progresivo nos ta kere firmemente den fortificacion di nos estado di Derecho incluyendo participacion di nos ciudadania. Pesey nos ta kere den introduci un systema unda pa Ley Parlamento di Aruba por yama un Referendum mediante un Landsverordening pa asina pueblo por tin participacion den cuestionan importante pa Aruba.

Ahusta Edad Minimo pa por Eherce Derecho Pasivo di Voto

Adapta e edad di 21 aña pa 18 aña pa por haci uso di bo derecho passivo di voto, pa por haci bo mes escogibel den un eleccion Parlamentario. Considerando cu un hoben por vota cu 18 aña, ta crea e espacio pa asina e lo por postula su mes riba un lista politico. E principio como punto di salida ta cu Pueblo, esta e electorado, lo ta esun cu na final di dia lo bay vota y escoge su representante.

Condiciona e Posibilidad di Entrega un Kabinete

Na momento cu surgi un crisis den gobierno un Prome Minister tin e autoridad pa manda su gobierno cas y disolve Parlamento sin prome consulta cu Parlamento. Pa percura cu no tin abuso di e oportunidad aki ta importante pa amplia e posibilidad na unda cu Prome Minister por haci uso di e provision aki den ley solamente si tin aprobacion di un 2/3 parti di Parlamento. Esaki lo percura pa tin continuidad parlamentario y unda cu un zakenkabinet temporario por keda instala pa finalisa e termino, den caso cu no logra yega na otro.

Introduci un Ley Temporal pa Efectonan di Covid

E ta importante pa subraya cu e efectonan di Covid riba nos comunidad y riba mundo lo keda sinti pa un temporada largo. Pa e motibo aki ta importante pa gobierno di Aruba no sigui usa e Ley di Calamidad pa sigui maneha e crisis aki lagando Parlamento un banda y di e forma aki ta mina nos estado di derecho.

Pesey nos ta kere den introduccion di un ley special cu ta regla e parti di e balansa entre libertadnan cu ciudadanonan tin y na ki momento gobierno por limita esakinan. E parti esencial di un ley asina ta cu nan momento cu tin un situacion

andando no premira mester consulta cu Parlamento di Aruba. Esaki no a keda haci pa e ultimo 12 lunanan unda cu pueblo su representantenan no tabatatin nada di bisa den e maneho di e Pais durante e pandemia.

Introduccion di un Autoridad pa Maneha Mercadonan Financiero

Meta primordial ta pa proteha e consumidornan y tin un miho control di e servicionan comercial di institutonan financiero. E lo bira un instituto independiente y su miembronan lo keda nombra door di Consejo independiente di Pais Aruba of Gemeenschappelijk Hof pa percura cu tin objectividad den nan control.

UN GOBIERNO CONFIABEL, RESPONSABEL Y SOSTENIBEL

Como un politico, instituto of organisacion bo tin e deber pa traha cu integridad. Esaki ta nifica cu mester mantene un nivel halto di profesionalismo y mester semper keda obhetivo na cada paso di e procesonan concerni.

Adaptacion, Revision y Introduccion di Maneho y Procesonan

Den e seccion aki lo duna un sumario di diferente conceptonan cu Accion21 ta considera necesario pa por logra maneho y procesonan mas confiabel, responsabel y sostenibel.

Introduccion di codigo di conducta pa Ministernan y Parlamentarionan

E condigo di conducta tambe lo keda aplica pa e aparato publico completo.

Proceso di Destaho Publico Transparente

Proceso di destaho publico mester keda transmiti y publica. Adicionalmente mester re-evalua nos Ley di Destaho Publico (aanbestedingsverordening) y nos Ley di Comptabilidad (comptabiliteitsverordening). Na momento cu resulta cu un proyecto ta rekeri “meerwerk” mester haci esaki publico tambe pa asina pueblo por mira dikon tin mester mas fondonan y con esakinan lo keda aloca y financia.

Fortifica Bureau di Integridad (BIA)

Fortifica e Bureau di Integridad pero mester percursa cu esaki ta bira un organo independiente los di tur Minister y Parlamentario cu por haci su trabao di controla. Cu por brinda conseho tambe sea obligatorio of no. Pesey nos kier introduci un Organo di Integridad & Continuidad. Cu ta un organo cu lo funciona independiente

y ta keda nombra door di hof y otro consehonan independiente. E importante di un organo asina ta cu nan lo por mitiga corrupcion pero percursa cu tin continuidad di gobierno pa gobierno.

Revisa e concepto di ley di Screening di Ministernan

Esaki por wordo implementa unabes cu amplia e LIM, pa asina percursa cu nos por tin candidatonan adecuado y capacita den e funcion como Minister y unda tambe lo yuda reduci e fenomeno di “friends & family” den Ministerionan.

Cambia Ley di Financiamiento di Partido pa uno Publico

Tur Partido cu ta eligible pa participa na eleccion lo ricibi un suma fiho di Pais Aruba pa por hiba nan campaña y unda na final lo mester haci entrega di un cuenta anual den cual lo hustifica con e fondonan a ser aloca. Esaki lo sigura un nivel igual y husto pa participacion electoral.

Combati Corrupcion den Companianan (Semi)Estatal

Introduccion di un maneho den forma di un ley pa combati corrupcion den companianan estatal y semi-estatal.

Introduccion di un Corruption Hotline y un Meldpunt

Introduci un linea telefonico pa por raporta corrupcion anonimamente of crea un punto di notificacion cu lo ta accesible mediante un website.

Introduccion di un Klokkenuidersverordening

Introduccion di un Ley cu ta proteha e identidat di esnan cu ta raporta actonan contra ley.

Introduccion di un Academia di Maneho (Bestuursacademie)

Land Aruba den pasado a conoce diferente curso pa esnan laborando den sector publico. Esaki lo percura pa tin un aparato gubernamental profesionalisa y actualisa. Esaki tambe lo evita cu lo por simplemente nombra personanan pa cierto posicion sin realmente tin e preparacion necesario.

Actualisacion y Modernisacion di LMA y BRA 1986

LMA (Landsverordening materieel ambtenarenrecht) ta e ley cu ta regla e position huridico di ambtenaar, mientras e BRA 1986 ta e ley cu ta regla e salario di ambtenaar.

Recluta y Selecta Personal (Werving en Selectie)

En bes di djis nombra un persona como ambtenaar den un cierto funcion, lo enforsa cu tur vacatura mester wordo publica pa tur hende por solicita riba dje. Elimina e uso di rango den nos sistema salarial y recompensa e ambtenaar a base di e funcion cu e ta eherce. E selection/nombracion di un persona pa un cierto funcion mester ta a base di e normanan obhectivo mara na e funcion manera: diploma, experiencia, conocimiento y capacidad. Pa garantiza obhectividad, e selection/nombracion di e persona lo ta den man di un comision independiente.

Promocion

Enforsa e sistema di evaluacion (beoordelingssysteem) y sigura cu ningun promocion por tuma luga sin un evaluacion.

E sistema di evaluacion lo garantiza obhectividad y lo elimina promocion di "compinchi" (voortrekkerij). Introduci

un procedura di apelacion unda cu un ambtenaar por apela un decision prome cu e tin di recurri na un caso den corte. Pa garantiza obhectividad, e promocion di un ambtenaar lo ta den man di un comision independiente.

Retiro di Funcion

Pa evita cu un ambtenaar ta wordo retira di gobierno of suspendi inhustamente of retira di un funcion inhustamente (specialmente directornan ora di cambio di gobierno), un comision independiente lo tin e decision den esaki.

Contractant y/of Consultant

Regula nombracion y salariacion di personanan cu ta bin traha temporalmente a base di contract. Specialmente e coordinadornan / personal di bureau di ministers. Contractant tambe tin di wordo evalua riba prestacion. Salario di ambtenaren mester wordo schaleer conhuntamente cu sector priva y kita e rangensysteem cu tin aworakinan.

UN APARATO PUBLICO MODERNISA, EFICIENTE Y TRANSPARENTE

E seccion aki lo cubri aspectonan con pa yega na un Gobierno cu un maneho abierto y accesibel pa cada ciudadano.

Introduccion di un Ley di Archivo

E ta importante prome cu introduci digitalisacion di tur nos documentonan, pa nos tin un ley cu ta splica ken lo maneha e documentonan y kende lo ta responsabel pa e documentonan aki. Pa por regula y defini e proceso aki lo introduci un Ley di Archivo.

Introduccion di un Ley di Proteccion di Dato Personal (AVG)

Segun e Landspakket, seccion H9, e paisnan den Reino lo traha hunto pa un nivel di proteccion harmonisa di dato personal den Reino atraves di un Ley di Reino. Unabes esaki tuma lugar, e lo percura pa Aruba, na unforma sigur y integral, por implementa e-governance. E ley aki ta crea e base solido pa por implementa digitalisacion di nos aparato publico y tambe provee servicio digital na nos ciudadanonan.

Publicacion di tur Documento y Archivo di Parlamento y Gobierno)

Hulanda ta percura cu ambos Gobierno, Eerste y Tweede Kamer ta publica y hasi accesibel tur documento publico via nan website den un termino cortico. Esaki ta crea transparencia pero tambe e confiansa necesario den comunidad, pa asina por keda informa na cada instante di decisionan tuma of proyectonan otorga.

Publicacion di tur Documento Publico riba website di Parlamento

Parlamento mester update nan website diariamente cu tur documentacion y grabacion di reunionan publico pa asina stimula transparencia y accesibilidad. Reunionan di comisionan cu no ta comparti informacionan sensitivo tambe lo mester wordo hasi publico pa di e forma aki Pueblo di Aruba tin un miho bista di e temanan cu ta keda trata den Parlamento prome cu nan keda trata den un reunion publico.

Publicacion di Agenda, Documento y Lista di Decisionnan di Ministerraad riba website di Gobierno

Recientemente na Hulanda a declara cu lo hasi tambe tur agenda, documento di ministerraad publico, pa asina trese bek confiansa den gobernacion despues di e incidente cu e *toeslagenaffaire*. Esaki ta algo cu pa Accion21 ta di sumo importancia y lo tine como un prioridad pa logra e transparencia pero tambe responsabilisacion di nos aparato gubernamental, gobierno y nos gobernantenan.

Finalmente, como Partido e vision di nos plan ta pa por trece mas modernisacion pa asina sigura participacion real y transparencia. Unda e ciudadano ta sinti cu e ta un prioridad di gobierno y na unda tanto e interes como e bienestar general ta un prioridad.

Adicionalmente nos enfoke ta ariba mehoracion di e calidad y eficiencia di e servicionan cu ta keda brinda na cada ciudadano.

PLAN SOCIAL - LABORAL

Nos vision ta pa brinda segundo oportunidad na cada cuidadano y un estructura di cuida y guia pa atende cu e crisis social cu ta asotando nos pais.

Como un partido liberal progresivo nos ta kere den crea un estructura caminda cada cuidadano por reintegra den mercado laboral. Nos kier empodera tur hende cu herment necesario pa alcanza nan potencial maximo y converti den nan mihor version.

Nos a reparti e solucion den cinco area di enfoke:

- 1. Plan Accion Social Nacional Aruba**
- 2. Ahusta e LIM y separa Ministerio di Hubentud for di Ministerio di Salud**
- 3. Maneho y ampliacion di estructura di cuida social**
- 4. Derechonan importante**
- 5. Plan Accion Laboral**

PLAN ACCION SOCIAL NACIONAL ARUBA

DECLARA ASUNTONAN SOCIAL UN EMERGENCIA NACIONAL

E ta importante pa cuminsa na declara Asuntonan Social como un emergencia nacional. Esaki kier men inicia un proceso di inventarisacion profundo cuminsando cu leyman hopi anticua cu mester keda adapta of ahusta. Esaki ta inclui un revision di e Social Crisis Plan pa wak unda fondonan a bay y kico ta e *stand van zaken* di e SCP. E ta cuminsa cu un *0-meting* basa ariba e condicion social cu nos ta reparti den diferente grupo:

- Pre-natal y Infantil
- Mucha
- Puber
- Hobenan Adulto
- Adultonan
- Pensioenadonan
- Ancianonan
- Personanan cu limitacion
- Hoben indocumenta

E enfoke di e *0-meting* ta pa por haci un estudio of combina estudionan ya haci den pasado pa por brinda un bista di e situacion actual. Esey lo ta instrumental pa forma un plan di accion integral tumando na cuenta cada un di e gruponan den nos comunidad. E ta importante pa por ta transparente y cuminsa e creacion di nos *Social Progress Index*. Mientras cu tin un inventarisacion tumando lugar ta un necesidad cuminsa cu un plan di accion inmediato. Ta importante cuminsa na crea un sistema cu ta brinda guia y sosten na cada ciudadano di pais Aruba.

CENTRO DI BARIONAN

Den nos plan di ACCION SOCIAL NACIONAL ARUBA nos ta cuminsa inmediatamente cu un plan pa haci uso di local nos tin caba. Esaki ta pa fortifica e Centro di Barionan, actualmente nos tin nuebe:

- Oranjestad
- Noord
- Tanki Leendert
- Ayo
- Sta. Cruz
- Brasil
- San Nicolas
- Savaneta
- Dakota

Cu reintroduccion di OSEBA por cuminsa na brinda un fondo mas sostenibel na cada centro di bario. Esaki lo prepara nan pa bira e prome instancia di contacto pa sector publico y su respectivo servicionan. Atraves di un inventarisacion profundo den e barionan lo

- crea y update e *sociale kaart* di Aruba cu ta un raport profundo di tur e retonan social cu tin den e barionan

Lo studia e posibilidad di expande e infraestructura di e centro di barionan pa por inclui mas servicio y mihor sirbi nan comunidad.

Tambe ta importante reconoce cu trahadonan social y *opbouwwerkers* lo por asisti den brinda un mihor servicio di cuida y sosten mas local na e centro di barionan. Nan lo por p.e. conecta e residentenan cu ayudo publico of asisti nan den busca empleo.

Den combinacion cu un *sociale vangnet* nos por sigura cu ningun hende keda atras. Atraves di e centro di barionan lo construi un banco di data social.

AHUSTA E LIM Y SEPARA MINISTERIO DI HUBENTUD FOR DI MINISTERIO DI SALUD

MINISTERIO DI HUBENTUD

Cu reintroduccion di e cartera Ministerio di Hubentud berdaderamente nos ta percura cu hoben nan tin un bos den gobierno. E parti mas importante di e Ministerio aki ta pa sali na defensa di e derechonan di mucha cu a keda firma. UNICEF ta e departamento special di Nacionnan Uni cu ta promove y encurasha pa cu e derechonan di mucha keda salvaguardia. E ta importante haci un *0-meting* di kiko Aruba no ta cumpliendo segun e acuerdo internacional y crea un plan pa adresa e deficiencianan den nos implementacion. Ademá e ministerio lo tin e tarea pa crea un plan, incluyendo uso di facilidadnan manera centro di barío, pa stimula e siguiente:

- Deporte
- Arte
- Baile
- Poesia
- Gaming / Internet
- Clubnan Social
- Plantacion den Barío

Unda por introduci un plan nacional cu p.e. actividadnan deportivo entre e diferente centro di barionan. Asina expandiendo oportunidadnan pa hoben y stimula nan participacion den actividadnan constructivo. Nos kier mira e centronan di barío bira multi-disciplinario pa nan por inclui un kinder en jeugd centrum y asina brinda mas recurso di sosten y desaroyo.

- Introduccion di un Consulado Hubenil di Barío cu e meta pa hoben por haci proyectonan social pa e barío pa stimula empoderacion di nos hubentud.

- Un sistema unda cu tin proyectonan unda tin competencianan di baile, poesia pa asina cada hoben por expresa nan talentonan y desaroya nan creatividad.
- Fortificacion di Parlamento Hubenil como e organizacion pa crea lidernan di mayan ta necesario cu un infraestructura tura mas adecua pa por logra haya mas miembro. Tambe introduccion di un Consejo Hubentud Aruba cu ta combina miembronan di tur organizacion cu ta traha pa hoben cu por brinda conseho riba leyman cu ta keda presenta cu tin un impacto directo riba hoben. E estructura aki lo mester cay bao di Parlamento Hubenil di Aruba y lo haya e tarea di crea y fortifica e combinacion cu hoben y hoben adulto. Funda un organizacion nacional pa hoben cu ta haya ayudo di gobierno pa clubnan social, clubnan escolar, clubnan deportivo hubenil etc pa stimula mas actividadnan extra-curricular cu e meta principal di empodera nos hubentud. Akinan mester corda riba organizacion nan manera key club, interact, clubnan di debate, leerlingenraad y tur otro club cu alumnonan lo kier funda na nan scol.
- E ministerio di Hubentud lo costa Pais Aruba Afl. 0,- mirando cu den e parti di Asuntonan Social ta regla asuntonan pa cu hubentud. Pero nos di Accion21 ta kere cu sacando hubentud for di Asuntonan Social ta crea un mensahe di speransa pa hubentud y ta un movimiento simbolico importante cu nos hoben tin mester.

TRAHADONAN SOCIAL

Declaracion di un emergencia nacional ta rekeri cu un gran parti di trahadonan social mester drenta e *veld* pa por haci e inventarisacion. Ademas lo por expande e cantidad di trahado social kisas conhuntamente cu e facultad di Arte & Ciencia di Universidad di Aruba. Nos lo kier incorpora tur trahado social sin trabao den e plan ACCION SOCIAL NACIONAL ARUBA pa aumenta nos capacidad y reduci tempo di espera pa atencion. Den combinacion cu Departamento di Enseñasa lo kier studia e oportunidad di brinda mas oportunidad di preparacion profesional den e *veld* di trahado social.

MANEHO Y AMPLIACION DI STRUCTURA DI CUIDO SOCIAL

INTRODUCCION DI SOCDAB

SOCDAB ta para pa SOCIAL DATA BASE unda cu tur informacion importante regardando retonan social ta keda registra den un base di data central. E instancianan concerni mester por haya acceso pa por añadi y ricibi informacion pa asina ofrece nan clientenan un mihor servicio. Asina nos ta percura pa stimula y mehora e *samenwerking* pa SOCDAB y lo kier mira acceso comparti cu departamento di labor pa ofrece un mihor bista di e situacion di cliente. Esey lo facilita mihor control si e persona lo mester keda introduci den e *sociale vangnet* pa despues wordo reintegra bek den mercado laboral caminda posibel. SOCDAB tambe lo ta e sistema usa pa e centro di barionan pa asina duna un bista ariba e *sociale kaart* di Aruba.

GUIA Y SOSTEN PA E TIENER MOEDERS

Creando un plan integral cu enseñasa ta importante pa por establece un structura unda mamanan hoben por ricibi e guia y sosten necesario. Den combinacion cu un espacio pa por sigui scol y asina no pone nan enseñasa un banda. Ademas di esaki mester haci un inventarisacion di e *tiener moederhuis*. Asina nos por haya un mihor idea di kico e retonan ta y mas importante kico ta recursonan cu falta pa por percura cu e sosten necesario keda brinda. Introduci tambe e *zorgstructuur* pa percura cu e mamanan hoben aki por haya oportunidad den nos comunidad.

CUIDO PA ANCIANONAN

Combina cu e ministerio di salubridad publico e ta importante pa introduci un

ley di cuidado pa anciano esta *ouderen zorg*. Esaki ta combina cu *landsverordening zorginstelling* pa percura cu tin un structura implementa cu ta garantiza cu ancianonan ta haya cuidado digno. Ademas den caso cu tin un abuso esaki por keda raporta mes ora pa por brinda guia y sosten na e anciano. Crea condicion digno tambe pa e casnan di anciano y percura cu inspectie volksgezondheid ta haci inspeccion regularmente pa asina nos tin un miho bista encuanto e situacion di cuidado. Tambe mester cuminsa pensa ariba expansion mirando cu nos tin un sociedad cu ta *vergrijs* y no tin suficiente facilidad pa por brinda cuidado na e ancianonan. Tambe lo kier studia e posibilidad di extende orario di cuidado, p.e. Wit Gele Kruis no ta traha despues di 3:00pm of den weekend.

PERSONANAN CU LIMITACION

Combina cu Ministerio di Infraestructura, introduci reglamento cu cada edificio nobo y tur cu ta operacional na Aruba ariba un cierto tamaño mester cumpli cu normanan di e ARBO-WET pa persona *gehandicapt* y/of invalido den *rolstoel* manera:

- Parkeer blauw
- Rampa
- Baño cu espacio y infraestructura unda un persona cu limitacion por yuda su mes

Tambe den caso cu tin un lugar cu mas cu un piso mester por tin sea un lift of un lift special pa rolstoel pa asina percura cu e persona cu limitacion tambe por haci su compras y diligencianan.

E ta importante pa nos cuminsa crea un

sociedad mas inclusivo mirando cu e comunidad di persona den rolstoel ta sigui aumenta. Pesey nos tin cu cuminsa crea e infraestructura fisico cu ta brinda movilidad pa tur. Manera menciona anteriormente e grupo aki ya caba ta inclui den nos plan laboral y lo wordo inclui den *sociale vangnet*.

CENTRO DI ADICCION

Nos ta un organisacion cu ta para pa inclusion den sociedad y nos ta kere den segundo oportunidad pa tur. Pesey ta importante crea y fortifica centronan di adiccion cu guia y sosten psicologico y inclusion di gruponan di auto-ayuda. Mester inverti den *halfway-house* pa asisti e reintegracion di adictonan bek den comunidad. Tambe lo kier inverti mas den un plan di enseñasa pa conscientisa hoben y pueblo en general pa cu e retonan di adiccion. Durante su trayectoria di saneamento mester por ofrece oportunidad pa *bijsholing* y/of *herscholing* pa fortifica e probabilidad di exito den nan rehabilitacion. E centro di adiccion lo ofrece recuperacion pa persona cu problema di droga, alcohol, gambling, cuminda y otro comportacion destructivo. Ta sumamente importante pa crea un estructura di cuidado cu ta continua despues di rehabilitacion. Tambe lo kier ofrece servicionan basico na adicto ambulante pa segura cu nan ta ricibi cuminda, cuidado y servicionan pa hygienia.

SALUD MENTAL

Conhuntamente cu Ministerio di Salud y Departamento di Salud Publico (DVG) lo haci un inventarisacion di tur e facilidadnan cu ta brinda sosten psicologico y psiquiatrico.

Mirando e necesidad grandi, lista di esperanan largo y falta di personal cualifica lo expande infraestructura y fondonan pa cuidado di salud mental. Ta indispensable pa cuidado di salud mental ta accesibel pa tur cu mester. Tambe ta importante pa conscientisa pueblo tocante salud mental y elimina cualkier stigma.

RECLASSERING Y KIA (INSTITUTO CORECCIONAL ARUBA)

E ta importante pa crea un plan conhuntamente cu Ministerio di Husticia pa haci un inventarisacion di e situacion actual. Nos meta ta pa por crea mas oportunidad hasta pa persona cu a cay den man di husticia. Mirando cu 90% di persona interna na KIA tin mester di ayudo psiquiatrico kier expande e recursonan pa trata esey. Tambe lo kier introduci posibilidad di enseñasa y otro entrenamiento pa persona encarcela pa asina facilita nan reintegracion den sociedad. Empodera esnan encarcela cu herment pa crea un bida nobo ta e mihor siguransa cu nan no lo bolbe na comportamiento anti-social of criminal. Sin un alternativo realistico nosta condena nan na bolbe ripiti e mesun comportamiento.

ABUSO GENERAL

E ta importante pa fortifica Departamento di Asuntonan Social pa por brinda atencion, ayudo y guia na cuidadanonan cu ta bira victima di abuso verbal y/of fisico inmediatamente. Mester digitalisa e procesonan hudicial pa acumula data pa maneha e problematica den nos comunidad. E victima semper mester haña prioridad pero un berdadero saneamento ta inclui e agresor tambe. Si e no ricibi

ayudo y sosten pa e tambe recupera e comportamiento lo sigui. Reintegracion den sociedad di un manera sano mester ta e resultado di intervencion.

VIVIENDA SOCIAL

E ta importante pa por sinta cu FCCA y inventarisa e situacion di vivienda social, cuanto peticion tin y den caso cu nos mester crea mas cas unda ta e miho caminda pa crea nan. Futuro desaroyo di nos pais mester tene cuenta cu naturalesa y medio ambiente. Ta importante pa persona cu ta bibando den mondi sin domicilio permanente tambe wordo integra den e *sociale vangnet* pa asina cuminsa e proceso di nan reintegracion den sociedad y mercado laboral.

ABUSO SEXUAL

Un tema increíblemente importante cu no a haña su debido atencion. Nos ta kere den bin cu un *meldpunt* central cu e infraestructura adecuada:

- Verhoorkamer
- Onderzoekskamer

E facilidad mester inclui herment special pa mucha y traha 24/7 den forma di shift y incorpora:

- Un agente policial
- Un psicologo
- Dokter di confiansa (*vertrouwensarts*)
- Trahado social
- Asistencia medico capacita pa administra p.e. un rape kit

Por medio di esaki nos ta crea un ambiente mas sigur ora ta trata mucha y tambe ofrece inmediatamente e guia y sosten necesario. Ta importante pa tambe ofrece guia y sosten a traves di *slachtofferhulp* na miembro di famia.

Mester entrena mas personal medico den e administracion di rape kits pa por acumula evidencia y asina percura cu e abusadornan wordo cera. Pa combati abuso sexual sigur nos tin cu crea un plan di accion den combinacion cu e Ministerio di Husticia y *Gemeenschappelijk Hof* pa sigura cu nos por garantiza husticia como proceso di saneamento di e victima. Na mes momento e ta importante pa crea un plan di tratamiento pa e acusado cu na momento cu e keda encarcela na KIA e por haya ayudo psicologico. Nos lo kier studia e posibilidad di introduci castracion kimico como un posibel tratamiento continuo pa preveni e abusadornan di bolbe ofende.

Haci un inventario di locual gobierno a introduci caba conoci como e *Family Justice Center* pa no duplica esfuerzo y evalua si esaki ta un comienso ariba cual por expande.

FORTIFICA E VEILIGHEIDSHUIS

Un *task force* a ser crea y nos ta kere cu e structura aki lo ta uno cu por brinda siguridad despues cu un grupo di diferente departamento sinta cu otro pa hunto crea un plan preventivo pa combati retonan di husticia. Nosta premira cu conhuntamente lo por reduci e retonan social cu un plan preventivo formula a base di data comparti cu otro departamento.

BIJSTAND Y ONDERSTAND

Nos ta kere ta importante pa analisa con e sistema ta funciona y con nos lo por implementa un structura mas eficiente y husto. E mision di nos partido ta pa reduci e necesidad pa *bijstand* y *onderstand* atraves di un *sociale vangnet* cu lo empodera persona pa reintegra den mercado laboral y sociedad di un manera constructivo.

IMPEDIMENTO PARENTAL (PARENTAL ALIENATION)

E ta importante pa nos haci un inventarisacion profundo combina cu introduccion di cambionan den ley y reglamento existente pa preveni cu ningun mayor Arubano mester bolbe biba e sufrimento aki. Nos mester fortifica e structura di *voogdij* pa cada mucha por goza di acceso na ambos mayor. E resultado mester ta un structura cu ta sali na vanguardia di e mucha y asina facilita su desaroyo harmonioso.

REVISION DI CANASTA BASICO

Durante e pandemia nos a nota un pobresa nobo cu ta encera famia caminda diripiente tur dos mayor a perde nan entrada. Personanan no custumbra cu escasez financiero a haña nan mes dependiente di bono pa cuminda y sosten di otro forma. Nos ta kere ta importante pa revisa canasta basico y conhuntamente cu Departamento di Salubridad Publico y Ministerio di Salud establece un seleccion cu ta sigura un nivel necesario di alimentacion cu ta inclui p.e. suficiente proteina y vitamina. Nos ta para pa un programa di accion ariba come saludabel pa reenforza e vision di Accion21 encuanto

cuido preventivo, unda p.e. malesa cronico cu ta surgi a consecuencia di alimentacion inadecuado lo keda preveni.

DERECHONAN IMPORTANTE

RECONOCE Y LEGALISA MATRIMONIO DI MESUN SEXO

Como partido Liberal Progresivo nos ta para pa derechonan di cada ser humano den nan totalidad. Cada persona tin e derecho di biba, stima y forma nan famia den e forma cu nan ta desea y nos kier duna apoyo na nos diversidad. Nos lo cuminsa pa introduci schakelbepaling na union civil cu a keda introduci den nos condigo civil. Nos ta comprometi na derechonan humano y nos ta kere cu limita pareha di mesun sexo na union civil ta keda discriminatorio. Comunidad LGBTQ+ mester tin acceso na tur derecho civil cu pareha heterosexual ta benefica di incluyendo matrimonio. Conhuntamente cu Ministerio di Enseñasa y Departamento di Enseñasa nos kier brinda un structura guia na scolnan pa hoben conscientisa tocante nos diversidad y retonan di comunidad LGBTQ+. Creacion di un sociedad mas inclusivo ta enrikece nos cultura y identidad. Igualdad ta hancra den nos statuut y ta algo cu Accion21 ta para firmemente pa y no ta kere derechonan humano mester wordo logra door di consulta publico.

INTRODUCCION DI UN CAS DI DIVERSIDAD

Nos ta kere ta importante pa desaroya un Cas di Diversidad pa comunidad LGBTQ+. E facilidad lo fungi como un espacio multi-funcional pa brinda recurso na grupo y persona di minoria sexual. E iniciativa lo brinda:

- Un espacio sigur pa persona LGBTQ+ por reuni
- Un plataforma umbrella cu ta uni e esfuerso di e diferente organisacion

nan incluyendo ALFA, Becoming Equal, Orguyo, Igualdad etc.

- Un shelter pa persona LGBTQ+ cu ta enfrentando rechazo na cas, scol y/of misa
- Ofrece servicionan medico na comunidad LGBTQ+ cu personal capacita pa cu nan necesidad particular p.e. incluyendo PrEP; test pa malesa conduci sexualmente; atencion, guia y sosten di salud pa comunidad trans; recursonan pa cuidado di salud mental; number di telefon di sosten 24/7
- Celebracion anual di Pride
- Apoyo y guia pa famia gay incluyendo e derecho di adopcion
- Enseñasa sexual inclusivo pa hoben LGBTQ+ den scolnan
- Elimina discriminacion laboral y den vivienda
- Miembro(nan) di cuerpo policial dedica na abuso, asalto y asunto relaciona cu comunidad LGBTQ+
- Programa di conscientisa docente y otro persona encarga cu cuidado di mucha y con pa brinda sosten na esnan LGBTQ+ y preveni bullying

INTRODUCCION LEY PRO-CHOICE = LEGALISA ABORTUS

Como partido Liberal Progresista nos ta kere den autonomia di cada ser ariba su mesun curpa. Nos ta reconoce cu esaki ta un tema delicado y kier brinda tur ciudadano e guia y sosten pa nan por haci un decision informa y segura cu e ta esun corecto pa nan. Nos ta reconoce cu abortus

ta sosodiendo caba pero pa persona di menos recurso cu no tin acceso e por crea un peliger pa nan salud. Proteha e bida di e ser femenino ta un prioridad y nos kier combina esaki cu ayudo psicologico prome cu un decision asina importante y tambe despues di un abortus pa percura nan bienestar. Tambe ta importante pa terapia ta obtenibel pa e famia di e ser feminina mientras e ta considerando y tambe despues si ta necesario. Nos kier sigura cu e procedura aki ta existi di un forma sigur cumpliendo cu reglanan internacional pa esnan cu dicidi e ta e decision corecto pa nan na e momento ey.

PLAN ACCION LABORAL

INTRODUCCION DI E ARBO-WET

E punto cardinal ta pa por introduci e ARBO-wet, e ley lo tin 3 meta:

1. Salvaguardia e salud di cada empleado
2. Promove bienestar di e empleado
3. Brinda siguridad na e empleado

Esaki ta producto final di actualisacion di e dialogo social-laboral tripartiet unda tur partido ya caba a indica di kier mira e ley aki introduci. Introduccion di e ARBO-WET lo brinda un estructura cu ta apoya tanto e trahado y dunador di trabao pa por flexibilisa e mercado laboral. Asina lo por brinda mas espacio pa studiantenan y mamanan soltero por traha cuatro ora so y asina continua nan estudio y cuida pa nan yiu. Esaki lo empodera mas persona e oportunidad di drenta mercado laboral y reduci e cantidad di persona ariba *bijstand*. E beneficio pa e dunador di trabao ta cu e lo por haci un inventarisacion di e riesgo pa despues sinta cu e empleado y kisas sindicato pa por introduci medida pa mitiga e situacion. Esaki lo por conduci na rebaho den gasto pa e dunador di trabao unda tin un siguridad pa e empleado. Tambe e lo reduci e descontento di e empleado y percura pa un subida den productividad y reduci *walk-outs*.

Segundamente e introduccion di e ARBO-WET ta reemplasa e *veiligheidsverordening* 1 & 2 cu ta anticua pues e ley aki lo percura cu Aruba ta cumpli cu e normanan internacional di ILO (International Labor Organisation). E introduccion di e ARBO-WET ta cumpli cu e acuerdonan internacional C155 & C187 cu ta trata futuro di labor y flexibilisacion laboral.

Terceramente *ARBO-inspectie afdeling* ta keda integra cu DTI pasobra e *veiligheidsverordening* ta *verval* cu introduccion di e ARBO-WET. E maneho di inspeccion ta bira parti di DTI y *Arbeidinspectie* di DAO. Lo incorpora algun profesional cu lo haci e *risico inventarisatie*. Keur auto lo keda traspa pa garage nan certifica pa haci e proceso di inspeccion. Garage nan acredita lo paga gobierno pa e certificacion y tambe un suma ariba cada auto cu nan keur.

Finalmente, na momento cu nos introduci e ARBO-WET via Hulanda na ILO nos por bisa cu Aruba ta bira competitivo cu otro paisnan cu tin e tratado internacional aki. Esaki ta brinda un oportunidad cu nos como pais lo por ricibi sosten financiero pa por inverti den implementacion di e ley. Ademá di sosten financiero nos lo por ricibi sosten di conocimiento unda expertonan internacional ta bin Aruba pa por yuda crea e estructura conhuntamente cu un agenda di implementacion.

REVISION DI ARBEIDSVERORDENING 2017

Actualmente ta importante pa revisa e *Arbeidsverordening* 2016 cu no a drenta na vigor ainda pa por haci un inventario pa mira si mester introduci mas adaptacion. Mirando cu mas cu cinco aña a pasa, lo mester revisa pa percura cu e ley den su totalidad ta beneficioso pa tur partido concerni. Siguientemente nos kier expande ariba dos punto di e *Arbeidsverordening* pa por tene cuenta cu hoben y persona cu limitacion di movilidad cu ta laborando.

- Ampliacion di ley laboral cu un seccion di hoben

Eta importante pa nos asegura cu hoben tambe keda protegi, nos kier amplia e *Arbeidsverordening* su articulonan cu ta combati labor di mucha pa por cumpli cu e tratado di derechonan di mucha. Nos ta kere cu estudiante y hoben tambe merece e oportunidad pa por labora y ricibi e experiencia necesario. Actualmente hopi no por keda contrata pa falta di experiencia y kier aumenta e posibilidad pa estudiante por core stage.

- Introduccion di ley di inclusion (= *gehandicaptten verordening*)

Nos kier amplia inclusion pa cada ciudadano por ricibi oportunidad igual pa desaroya nan habilidad y asina alcanza nan potencial maximo. Esaki mester conta tambe pa persona cu limitacion fisico pa nan tambe por ricibi un espacio digno den nos mercado laboral. Introduccion di un *gehandicaptten verordening* lo preveni discriminacion contra persona cu limitacion fisico of otro limitacion.

INVENTARISACION LABORAL

Nos ta kere ta importante pa haci un inventarizacion di mercado y suministro. Asina nos por procura pa ofrece un mihor guia pa estudiante na momento di soge nan estudio y futuro carera. Tambe nos kier enfoca ariba persona cu ta sinti nan mes stagna y introduci e concepto di *lifelong learning*. Siglo 21 mester incorpora e posibilidad pa un persona sigui desaroya su mes continuamente y logra su potencial maximo. Introduccion di *bijsholing* y *herscholing* lo asegura cu cada ciudadano por mehora su preparacion profesional y existencia di un sociale vangnet lo facilita nan recapitacion.

REDUCI MERCADO INFORMAL

Ta importante pa reduci mercado informal pa salvaguardia derecho di tur trahado. Tambe nos lo kier mira mas entrenamiento di trahador local y un inventarizacion di con DPL ta otorga aprobacion pa asina crea mas incentivo pa entrena nos mesun hende nan.

INTRODUCI SVB DEN MINISTERIO DI LABOR Y ASUNTONAN SOCIAL

SVB mester ta preventivo y mester keda ahusta via e LIM den e Ministerio Social-Laboral. E motibo pa esaki nos ta elabora ariba den e siguiente puntonan:

- Pago di Cessantia via SVB: Ora e dunador di trabao wordo declara failliet of kier kita e empleado, hues mester dicta pa e empleado por ricibi su cessantia. Pa evita e punto aki lo kier introduci un estructura cu ta encera e *sociale vangnet* organisa bao DPL.
- E prognose keuring ta procura cu e aspecto laboral di cada persona keda stipula, esaki ta elabora cuanto por ciento e empleado lo por traha y si e lo por haci e mesun trabao of lo mester bay haci algo completamente diferente. Esaki lo brinda un porcentahe di *geschiktheid* y si e lo por integra bek den e trabao of no. Si acaso e no lo por traha bek den e mesun empleo e ta bira un *outplacement* y SVB lo indica ki tipo di funcion e lo por ricibi. Esaki lo wordo traspasa pa DPL cu lo tin e *sociale vangnet* y asina nos ta evita cu e trahador lo pidi *bijstand* mirando cu tin un responsabilidad comparti pa yuda reintegra bek den mercado laboral. Durante e periodo di reintegracion lo purba ofrece te cu 80% di su salario.

E termino AO ta keda usa pa trahado wordo *ingewerkt*. Di e bedrag di AO cu dunador di trabao ta paga SVB lo purba financia 80% di e empleado su salario mientras e ta wordo integra bek den mercado laboral.

E structura aki ta conoci como outplacement combina cu reintegracion facilita pa e *sociale vangnet*. E meta final ta reduci e cantidad di peticion di *bijstand* y reduci desempleo. Asina nos por crea mas espacio financiero pa gobierno inverti den mas recurso di prevencion. Nos vision ta mehora movilidad social, inverti den e *sociale vangnet* y crea un sistema di sosten social-laboral mas duradero y eficiente mientras nos ta reduci gastonan di sector publico.

INTRODUCCION

Mundo a cambia hopi durante e ultimo decenianan. Hopi pais ta ocupa/ brainstorm tocante e pregunta: "Con nos mester cambia nos Enseñansa di tal forma cu e meta pa e alumno ta ekipa pa siglo 21"?

E sociedad mundial a transforma enormemente. Profeshonnan di awendia lo no existi mas aki cinco aña, parcialmente pa motibo di tecnologia. Enseñansa tin cu desaroya hunto cu e cambianan. Enseñansa mester ser reforma di tal manera cu e estudiante tin e competencianan adecua pa por logra sirbi e sociedad y economia di nan pais.

UNESCO ta indica den su rapport "*Rethinking Education*" (2015) cu Enseñansa ta e yabi pa e desaroyonan integral global (*global integrated and sustainable goals*). Un calidad minimo di Enseñansa ta rekeri pa e paisnan tin un bon base pa *Learning throughout life in a complex and rapidly changing world*.

Den corto bisa tur pais mester tin como meta SDG 4¹ pa asina e calidad di Enseñansa mehora. Asina cada persona por haya y tuma e oportunidad pa un Enseñansa pa bida largo (*Long life learning*).

Accion21 ta comparti e vision aki relaciona cu Enseñansa. Nos di Accion21 ta desea di crea ciudadanonan global balioso y digno pa medio di Enseñansa. Ciudadanonan cu por desaroya hunto cu un mundo cambiando rapidamente. Ciudadanonan cu ta tuma nan oportunidad y ta desea lo miho pa nan mes y nan pais. Ciudadanonan critico y asertivo. Pa logra esaki bo mester sa kende bo ta, conoce bo cualidad- y retonan. Pa esaki mester di un ambiente di seguridad den scol. Ta esensial pa agrega e materia DESAROYO PROPIO den e curiculo di tur scol.

¹ Transforming our world; The 2030 Agenda for Sustainable development - "Ensure inclusive and equitable quality education and promote lifelong learning opportunities for all" (UNESCO, 2030) - Education 2030.

Ken ta e aprendiz? Nan ta alumno y/ of estudiante for di desde kleuterschool (Enseñansa preparatorio) te un Enseñansa profesional (intermedio of halto) y ciencia avansa (wetenschappelijk).

Accion21 kier asegura cu e desaroyo educacional di e alumno- y studentenan aki haci di nan un ciudadano global (di mundo). Ta necesario pa tin habilidad di siglo 21. E habilidadnan aki no ta nobo, pero si ta uzabel den siglo 21. Nan ta yuda nos alumno- y studentenan pa haya nan caminda den un mundo compleho.

- Pensa critico
- Pensa creativo
- Resuelve problema
- Pensamento computativo (un manera practico y creativo pa resolve problema usando instrumentonan digital)
- Habilidadnan basico di ICT
- Sabiduria di medianan di comunicacion
- Colabora, traha den equipo
- Habilidadnan cultural y social (ciudadania)
- Auto-regulacion

Cu e metodo didactico corecto por logra siña e habilidadnan menshona. Pa desaroya e habilidadnan di siglo 21 sera e aprendiz, e docente mester añadi esakinan na e curiculo. Y mester percura pa conscientemente ser traha riba habilidadnan di siglo 21.

Siña e habilidad- y actitudnan ta existi primordialmente conocimiento y experticio di e disciplina (materia). Ta importante pa conscientisa e aprendiz di

e forma con nan ta studia y con nan ta procesa e informacion pa conocimiento. E ta yuda pa stimula un actitud curioso y conecta cu ta influencia e motivacion intrinseco pa siñamento.

E desaroyo di e habilidadnan di siglo 21 por ser mehora mediante Enseñansa "significativo di bida real". Por ehempel door di integra materianan den disciplinan amplio.

Accion21 ta desea pa duna e poder nan nos alumnonan pa ta exitoso den siglo 21 mediante:

- Ehecuta un *nulmeting* pa determina cuanto actualmente nos ta ofrece e habilidadnan di siglo 21 na tur nos scolnan
- Adapta e *normbedrag* na locual realmente ta e necesidad di e alumnonan. E *normbedrag* mester ser adapta pa tur nivel di Enseñansa
- Actualisa y desaroya (unda ta necesario) nos curiculo riba tur nivel di Enseñansa pa asina nos alumnonan por crece y sobresali
- Añadi conscientisacion di animal den e curiculo di scolnan basico
- Maneho di idioma (*Taalbeleid*) enfocando riba Hulandes y Ingles
- Duna nos idioma Papiamentu como materia (mescos cu Fries na Friesland) desde scol basico te examen final di MAVO, HAVO y VWO
- Introduci e materia Desaroyo Propio riba tur nivel di scol den e curiculo. Desaroyo Propio ta ekipa e alumno cu habilidadnan riba nivel social emocional. E materia aki ta traha

preventivo door cu e alumno ta siña instrumentonan pa por maneha retonan di bida.

- Provee material di scol di siglo 21 den e sentido mas amplio dje palabra
- Haci posibel actividadnan extra curricular na tur scol (primario y secundario). Alumnonan despues di orario di scol, por keda eynan pa siña habilidadnan (enfoca riba esnan di siglo 21, manera deporte, debati, baile, pinta, programanan di computer) te 6.00 pm. Docentenan lo no duna e actividadnan extra curricular, pero fundacion-, companian priva of un departamento di gobierno (IBISA). E fundacion- y companianan di sector priva ta huur e edificio. Edificionan escolar despues di 1.30 pm (primario) of 3.30 pm (secundario) ta bashi. Mediante actividadnan extra curricular e edificionan lo ser uza optimalmente
- Tur estudiante ta haya informacion general di nos constitucion y sistemanan politico. Tur miembro di nos sociedad mester por haya e informacion y instrumentonan pa tin un bon comprension di con nos pais ta funciona y ta ser maneha. Accion21 ta kere sagradamente den sostene y aporta na e desaroyo di ciudadanonan bon informa
- Miho guia pa scoge *profielen*
- Miho guia pa estudiante durante e proceso di investiga y scoge e estudio y carera cu nan kier sigui den futuro

STRUCTURA DI CUIDO

Un clima sigur di estudio ta hopi importante si bo kier studia (traha). Pa esaki algun condicion minimal ta necesario. Accion21 kier percura pa esaki ta presenta mediante:

- Un estructura di cuidado (cu ta funciona bon) pa tur scol. Por ehempel duna entrenamiento na docente pa reconoce e pasonan cu mester ser tuma den señalá problemanan / situacionnan social cerca alumno
- E trabou di consehero (counselor) mester ta uno full-time na cada scol
- Un protocol di intimidacion cu ta actual y cu ta funciona optimal
- Un consejo estudiantil y consejo participativo (*medezeggingschapsraad*) pa tur scol. Esaki pa stimula participacion di alumno, personal dje scol y mayornan pa haci'e scol miho
- Mas trahado social y docente mediador³ pa tur scol. Na e momento aki, p.e. pa tur scol di SKOA (46) tin solamente 3 trahado social den servicio
- Disponibilidad di sosten psicologico pa ambos docente y alumno. Actualmente pa 1500 docente na Aruba tin solamente un psicologo disponibel

E DOCENTE

Pa por desaroya e habilidadnan di siglo 21 cerca e alumnonan, e docente tin cu añadi nan na e curiculo y percura cu conscientemente ta traha riba nan durante les. Siña habilidad y actitud ta rekeri primordialmente conocimiento y experticio di un disciplina. Ta importante pa conscientisa e alumno di e forma con nan ta studia y con nan ta procesa informacion pa conocimiento. Ta yuda pa stimula un actitud curioso y responde riba e motivacion intrinseco pa siña.

Nos docentenan mester ser sosteni y haya upgrading pa por haci esaki. SIMAR den consulta cu su miembronan a indica algun punto di atencion (*speerpunten*) pa por logra esaki.

Accion 21 ta sostene e puntonan di atencion di SIMAR y ta expande nan:

- Adapta maneho di tarea (*taakbeleid*) cu ta resulta den mas espacio pa profesionalisacion
- Acredita tur estudio di IPA
- Introduci e posibilidad pa por studia *deeltijd* na Aruba (MBO, HBO y WO). Esaki ta haci'e atractivo pa studia banda di bo trabou (salario ta necesario pa mantene bo familia y bo mes) y sigui desaroya bo mes
- Haci salario competitivo den region
- Docentenan ta haya anualmente un "promocion di experticio"⁴ activo door di introduci un ciclo (di tres aña) di progreso, funcionamiento y evaluacion. E promocion aki ta ser duna a base di e shete competencianan di e docente. Mediante e introduccion di promocion di experticio e sostenibilidad y calidad di e docente ta ser garantisa

- Cuido y sosten pa docente. Un ehempel ta introduci un persona di confiansa pa docente
- Asistente di docente, banda di asistente di docente tecnico, pa tur scol
- Un miho guia pa docente y refresca su conocimiento anualmente tocante estudionan nobo y/of opcion pa estudio adicional pa alumno. Esaki por apoya e decano pa guia y conseha alumno

MINISTERIO DI ENSEÑANSA

Aruba ta conta cu mas o menos 22000 mil aprendis cu ta studia na diferente scol y instituto. Ministerio di Enseñansa ta responsabel pa e calidad di Enseñansa na Aruba conhuntamente cu Departamento di Enseñansa, Dienst Inspeccion Aruba, Bureau di Enseñansa Obligatorio y directivanan escolar. Ministerio di Enseñansa tambe ta responsabel pa e calidad di infraestructura, proceso y sistema di tur scol y instituto.

DEPARTAMENTO DI ENSEÑANSA (DEA)

- Adapta y/of cambia e leyman necesario pa asina Enseñansa por desaroya
- Inventarisacion di e necesidadnan financiero di tur nivel escolar pa tin un bista concreto di e situacion actual
- Introduci un mecanismo di financiamiento pa busca financiamiento internacional y/of subsidio
- Percura pa profesionalisa docente riba presupuesto⁵
- Desaroya un curriculo cu ta garantiza habilidadnan di siglo 21 pa tur nivel escolar. Modernisa y optimalisa e *kerndoelen* pa siglo 21
- Revisa, adapta y innova e metodonan pa scol special (primario y secundario). Es decir actualisa y modernisa esaki. Asina e alumnonan por ta mihor prepara pa mercado laboral.
- Percura pa tin control (contenido) di nivel pa examen escolar (SE) y examen central (CE) cu ta ser traha na Aruba. Esaki ta posibel via un laso di cooperacion cu CITO
- Traha un plan a largo plaso/multi-anual pa innovacion di tur nivel di Enseñansa

DIENST INSPECCION ARUBA

Por haya e tareanan central di Dienst Inspectie Aruba riba www.ea.aw

- Percura pa cumpli cu e prescripcionnan legal relaciona cu Enseñansa
- Raporta y conseha e Minister di Enseñansa y otro stakeholder tocante desaroyonan señala
- Evalua e calidad di Enseñansa
- Stimula e scolnan pa traha riba nan propio calidad di cuida

Den transcurso di añanan e tareanan a keda basta negligisha. Un inspeccion cu ta funciona optimal lo contribuí pa e nivel di Enseñansa sobresali na Aruba.

Accion21 kier facilita Dienst Inspeccion Aruba pa alcanza e tareanan aki dor di:

- haci un *nulmeting* pa constata tur e retonan cu tin den Dienst Inspeccion Aruba
- optimalisa e Dienst Inspeccion Aruba dor di traha hunto cu Inspeccion di Hulanda.

BUREAU DI ENSEÑANSA OBLIGATORIO

Na Aruba nos tin e ley di *leerplicht*. Accion21 kier modernisa e ley aki pa asina e alumno por saca lo maximo di su mes. Pa logra esaki ta necesario pa e *leerplicht* (cu ta cuminsa desde Enseñansa primario te ora un alumno tin 16 año) ser modernisa y adapta pa un *startkwalificatie*. Un *startkwalificatie* ta un diploma di HAVO, VWO, MBO nivel 2 (*basisberoepsopleiding* di Hulanda) of mas halto.

Cu un *startkwalificatie* bo tin mas oportunidad pa haya un trabou. Pa e motibo aki Accion21 ta boga pa adapta *leerplicht* pa un *startkwalificatie*. Asina mas alumno/estudiante tin un miho oportunidad riba e mercado laboral y nan por crea un miho bida pa nan mes y pa nan famia.

Accion21 tin e siguiente puntonan di accion pa cu bureau di Enseñansa obligatorio:

- Adapta e ley di *leerplicht* pa *startkwalificatie*
- Un control y mantencion funcional di e *startkwalificatie*
- Un miho fluho y coneccion entre tur nivel di educacion

DIRECTIVA ESCOLAR

- Establece la sonan formal di cooperacion cu institucionnan educacional
- Haci posibel e participacion di sector priva pa por inverti den educacion profesional (*beroepsonderwijs*)
- Educa lidernan institucional tocante manejo di presupuesto
- Conecta necesidadnan presupuestario na e Plan Educacion Nacional (PEN 2030)
- Inventarisa continuamente riba tur nivel kico e necesidadnan di e specialistanan ta. Por ehempel suficiente personal di ICT. Momentaneamente digitalisacion di Enseñansa ta ser spera, pero no tin suficiente personal pa por ehecuta esaki debidamente
- Haci uzo di institucion- y expertonan local (e.o. IPA y UA)
- Informa docente kico e posibilidadnan ta di *trekkingsrecht* y presupuesto di

formacion (transparencia)

- Anualmente liderazgo mester discuti y stimula promocion di experiencia (*deskundigheidsbevordering*) cu docente
- Inclui dia di estudio (*studiedagen*) obligatorio den e programa anual. Na Hulanda, p.e. na MBO, gobierno ta duna 59 ora anualmente na un docente pa e por uza pa promocion di experiencia. Docentenan mester sinti cu nan por y mag di profesionalisa legitimamente sin sinti nan mes obstaculisa
- Un cultura di cooperacion ta promove y stimula intercambio di conocimiento
- Facilita otro forma di "Enseñansa tradicional". Pensa riba Enseñansa basa riba proyecto, of estilo "dalton" y "montessorrie" etc.

INFRASTRUCTURA, PROCESO Y SISTEMA

- Gasto pa mantencion di facilidad, mueble, diseño y instalacionnan (digital) mester ser traslada pa e ministerio responsabel pa infraestructura
- Decentralisa scol di ministerio, pa asina e directivanan escolar tin mas control riba kico ta pasa na scol
- Aboli nombracionnan politico
- Introduccion di e norma cu ora yena tur vacatura, mester sigui un procedura di solicitud transparente
- Crea un plataforma cu ta stimula intercambio y comunicacion entre tur stakeholder di Enseñansa. Ehemplen di dos plataforma cu ta haci esaki ta Erasmus+ y eTwinning⁶.
- Mehora e infraestructura pa digitalisacion den Enseñansa

⁶ eTwinning ta un iniciativa di e Comision Europeo cu tin como meta pa encurasha scolnan Europeo pa traha hunto mediante tecnologianan di informacion y comunicacion door di provee e infraestructura necesario.

PROYECTONAN DI INCLUSION

EPB Y EPI

Nos di Accion21 kier traha, den cooperacion entre EPI y EPB, riba mas inclusion di e calidadnan di nos alumnonan/studiantenan pa asina nan gana experiencia. Esaki nos kier logra e.o. desaroyando proyecto:

- Un *kinderdagverblijf subsidia* pa fondonan y/of sector priva; pa asina mayornan hoben por sigui nan estudio na EPI sabiendo cu nan yiunan ta sigur. Un bentaha adicional di esaki ta cu studiantenan di EPI di e sector Cuido y Bienestar por sigui nan pasantia na e *kinderdagverblijf* aki
- Un oficina di administracion subsidia pa fondonan y/of sector priva; akinan studiantenan di EPI/EPB di e sector Administracion por ofrece nan servicio na un prijs atractivo pa negoshi chikito y mediano. Mediante e proyecto aki lo crea luganan di pasantia pa studiantenan di EPI/EPB
- Un espacio di exhibicion subsidia pa fondonan y/of sector priva; akinan studiantenan di EPI/EPB di sector Ciencia y Tecnologia ta haya e espacio pa exhibi nan proyectonan. Empresarionan por bishita e centro aki y hiba proyecto (contra pago) den nan propio desaroyo. Pensa riba meuble diseña, desaroyo tecnico etc. E studiantenan ta haya exposure cu tin como consecuencia cu un negoshi facilmente por ofrece nan un luga di pasantia
- Tayernan subsidia pa fondonan y/of sector priva, manera p.e. "con bo ta come saludabel"; door di nan cushina extenso e sector HORECA ta ofrece e posibilidad pa duna tayer na e Arubiano

cu mester ayudo pa cushina un plato saludabel pa su famia. Akinan tambe luganan di pasantia pa studiantenan di EPI/EPB ta ser crea

Accion21 ta convenci cu nos scol- y studiantenan tin hopi talento. Facilitando e tipo di proyectonan aki pa medio di adapta ley y crea fondonan, nos studiantenan ya durante nan estudio por duna un aporte valioso na nos sociedad. Ademas nan ta traha riba nan habilidadnan di siglo 21. Haciendo e proyectonan aki posibel, bo ta percura mas inclusion ambos di scol, estudiante y negoshi di Aruba.

PA TUR SCOL

Enseñansa mester kier haci di su alumnonan/studiantenan ciudadanonan di mundo consciente. Un instrumento pa forma ciudadanonan di mundo ta pa tin conscientisacion como un punto di agenda. Conscientisacion por stimula bo. Pa e motibo ey nos kier pa scolnan duna mas atencion n'e contenido di conscientisacion:

- Dia Internacional di e Derecho di Mucha (november)
- Diabierna Biña, LGBTQ awareness (december)
- Dia Internacional di Salud Mental (oktober)

E tipo di programanan aki no ta costa mucho placa. Ta un cuestion pa acerca instancianan y haya material (digital) pa ehecuta bo programa.

CULTURA Y DEPORTE

Cultura y Deporte ta dos instrumento cardinal cu por ser uza pa e desaroyo di un ser humano desde infancia te anciano. Nan ta aporta na e formacion personal di cada ciudadano y ta crea e identidad di un pais.

Cada cuidadano mester tin e oportunidad maximo pa por studia y eherce esakinan y tin e posibilidad pa por engrandece nan mes riba e terenonan aki.

Cultura y Deporte especialmente ta dos area hopi importante pa e formacion di hubentud di bo pais y alabes por aporta na un miho calidad di bida pa sernan di 60+ aña.

Cultura y Deporte no ta sectornan cu ta para riba nan mes. Pa un bon maneho, uzo y desaroyo di esakinan ta imperativo pa tin un maneho integral, inter-ministerial y inter-departamental, ya cu nan ta alabes directamente liga na Salubridad Publico, Enseñanza, Infraestructura y e desaroyo Socio-Economico di un pais. Den e programa di partido di Accion 21 nan tin un rol den cada un di e sectornan ariba menciona.

Den e vision y mision di Deporte y Cultura mester tene cuenta cu Aruba ta un *Small Island Development State* y semper mester ta positivamente liga na *Sustainable Development Goals*.

CULTURA

Cultura ta un area hopi subestima den politica. Un dje motibonan ta cu cultura no ta ser bon comprendi. Aunke tin hopi diferente forma con a trata di describi kico cultura ta, p.e.:

“Cultura ta e caracteristicanan y conocimiento particular di un grupo di persona, incluyendo idioma, religion, cushina (gastronomia), custumbernan social, musica y artenan”

E definicion di UNESCO (2001) ta:

“Cultura ta un set di diferente característica spiritual, material, intelectual y emocional di un grupo social cu ta inclui no solamente arte y literatura, pero forman di biba, forman di biba hunto, sistemanan di (norma y) balor, tradicion y creencia”.

E palabra cultura ta bin di e palabra Latino “colere”, locual ta ser defini como “cultiva” y “tendencia”: “e tendencia pa cuida e tera (planeta/mundo) y crece, of cultiva y aprecia”.

Cultura ta provee beneficinan social y economico importante. Cu miho prestacion di studia y di salud, un aumento di tolerancia y oportunidad pa uni cu otro, Cultura ta engrandecenos calidad di bida y ta incrementa e bienestar general di ambos e ser individual y comunidad.

Alabes Cultura ta influencia nos creencia relaciona cu kico ta corecto y incorecto, nos actitud incluyendo kico nos ta gusta y kico no, nos balornan REGARDANDO kico ta bon y malo, y nos comportacion. Di e influencianan cultural aki, nos identidad ta ser forma.

Si pa logra sostenibilidad ta primordialmente haci uzo di e recursonan di nos planeta, cultura mester ta central den nos strategianan di desaroyo, ya cu culturanan ta marca relacionnan humano cu otro den sociedad y e mundo na nan alrededor, incluyendo e ambiente natural y ta condiciona nan comportacion. Ademas, como sectornan di actividad, patrimonio y industrianan creativo ta contribui significativamente na e obhetivonan identifica den e congreso di Rio +20: desde “trabounan berde” y patronchinan di consumo y produccion mas sostenibel, hasta comunidadnan resiliente cu ta capaz pa confronta desastrenan miho y tin acceso na awa y e alimentonan, reduciendo e desekilibrio y pobresa den e regionnan y fortaleciendo e sostenibilidad.

MANEHO INTEGRAL Y SOSTENIBEL

- Cultural Governance Code¹
- Inter-Ministerial
- Inter-departamental
- Multi-disciplinario

Ta importante pa implementa e *Cultural Governance Code* (i.e. *Corporate Governance Code*) na e institucionnan subsidia pa gobierno, cual ta trata e maneho y control interno riba esaki y responsabiliza plan y actividad (*checks and balances*);

Mescos cu Deporte, cultura tin di haber cu diferente sector y area di Aruba, cual ta rekeri un maneho integral (conhunto);

¹ Cultural Governance, Kwaliteit van Bestuur en Toezicht in de Culturele Sector, Stichting Kunst en Zaken (2000)

Riba nivel gubernamental, cultura, mescos cu deporte, mester forma parti di un maneho inter-ministerial riba un nivel multi-disciplinario pa por yega na un calidad progresivo maximo di e ramo aki, ya cu tin diferente ministerio, departamento y disciplina involvi.

PRESERVACION DI NOS PATRIMONIO CULTURAL Y NATURAL

- Legislacion
- Conservacion
- Documentacion y Estudio
- Educacion/Conscientisacion di nos Herencia Cultural
- Promocion

Cultura ta e fundeshi di un sociedad. E fundeshi mester ta solido y na Aruba nos herencia cultural ta carece masha hopi di legislacion adecua. Hopi ley ta anticua of simplemente no tin ley. Pa e fundeshi por ta solido, mester update leyman anticua y percura pa tin legislacion unda cu falta. Aruba ta miembro di tratadonan internacional, pero hopi biaha no tin ley di implementacion na nos isla. Den extremo por yega na un “Ley General di Cultura” den cual tur e diferente areanan cultural ta protehi (e.g. *Ley General De Cultura di Colombia* unda cultura a ser reconoci como e wortel/rais, e base of razon di e nacion Colombiano). DWJZ² ta crucial den esaki;

Conservacion di nos patrimonio cultural y natural ta sumamente importante y mester ser trata adecuadamente. Nos tin e parti di nos herencia cultural tangibel (material), cu ta encera nos herencia cultural movibel (pintura, escultura, moneda, manuscrito), nos herencia inmovibel (monumento, sitionan arkeologico etc.), nos herencia subacuatico (naufragio/wrak, ruinan bou awa etc.) y nos tin e parti di nos herencia cultural intangibel (inmaterial) cu ta regarda nos tradicionnan oral, *performing arts*, ritualnan etc. Nos patrimonio natural ta encera sitionan natural cu aspectonan cultural (paisahe cultural), formacionnan fisico, biologico of geologico;

Ta importante pa nos herencia cultural ser documenta y studia. Ambos GO's³ y NGO's⁴ cu ta traha riba tereno cultural of tin di haber cu esaki, mester ser stimula y sosteni. DCA⁵ na Aruba ta crucial den esaki, banda di MANA⁶, ANA⁷, BNA⁸, UA⁹ y otronan;

Ta importante pa educa y conscientisa nos pueblo di e importancia di nos herencia cultural. Esaki ambos por medio di educacion formal y informal;

Nos herencia cultural mester ser promovi den tur sentido di palabra pa fortifica nos identidad unico como Arubiano.

Exoneracion di BTW (incluyendo pa stranhero) pa edificio den decadencia. Manera na Hulanda nos ta defini un edificio den decadencia como uno cu daño structural na muraya, vloer, dak, plafond,

2 Directie Wetgeving en Juridische Zaken
3 Government Organizations
4 Non-Government Organizations
5 Directie Cultuur Aruba
6 Museo Arqueologico Nacional Aruba
7 Archivo Nacional Aruba
8 Biblioteca Nacional Aruba
9 Universidad di Aruba

kozijn, bentana, corona, trapi pa mas cu 50% den su totalidad y por nota cu no a haci mantencion regular. Si suministro di awa, coriente of riool no ta viabel mas.

PAPIAMENTO

- Rol Central di Papiamento
- "Camber di Papiamento"

Bo idioma ta fundamental pa bo identidad cultural. Ora un idioma desaparece, e cultura ta muri. Idioma ta un dje partinan mas importante di cultura. E ta e forma con bo ta comunica cu otro, construi relacionnan y ta crea un sentimiento di comunidad. Papiamento, skirbi y lesa ta partinan integral di bida diario, unda idioma ta e instrumento primordial pa expresa y comunica. Aunke Papiamento ta existi pa mas di 300 aña y na Aruba desde 1976 e tin su ortografia, desde 2009 su vocabulario oficial y desde 2010 e tin su manual di gramatica (morfologia). Papiamento mester tin un rol central na Aruba y mester conscientisa e Arubiano y stranhero pa su uzo corecto;

Idiomanan ta dinamic y ta cambia durante tempo. Na diferente pais tin linguista cu ta dedica nan mes na cambianan den uzo di idioma y cada pasa tanto aña (dos aña na Hulanda) ta publica tur cambio oficial den su uzo. Ta imperativo pa na Aruba bin un "Camber di Papiamento" cu ta enfoca pa studia nos idioma y percura pa e influencia- y cambianan ser oficialisa y haci publico pa nos idioma ser uza corectamente.

CULTURA Y ENSEÑANZA

- Educacion Cultural den Curiculo Escolar
- Educacion Cultural den Tra'i Merdia / Actividadnan Extra Curricular
- Cultura den Centronan di Bario
- Estudio den Ramo Cultural
- Rietveld Academie

Por medio di educacion cultura ta ser comunica na un mucha/hoben, door di cual e ta custumbra cu tradicion, custumber, balor y patronchi di comportacion cu ta reina den su grupo. E conocimiento aki ta permiti'e pa adapta na su alrededor social pa asina e por logra su socialisacion. Educacion ta hunga un rol crucial den transmision di cultura; esaki ta ser logra ora preservacion ta ser haci di un generacion pa un siguiente. Cultura por ser desaroya via Enseñanza. Educacion ta trece e cambio desea den ambos e balornan cultural pa progreso y desaroyo di un sociedad;

E teoria di *Multiple Intelligences*¹⁰ (Howard Gardner [Harvard Professor], 1988) ta diferencia e inteligencia humano den "modalidadnan di inteligencia" specifico, na luga di defini inteligencia como un solo habilidad en general. Un dje areanan defini ta Musica (expression cultural), cu ta e area di inteligencia cu sensibilidad pa zonido, ritmo y tono di musica. E personanan cu inteligencia musical normalmente tin un bon tono of por posee un tono absoluto y tin e capacidad pa canta, toca instrumento musical y compone musica. Nan tin e.o. sensibilidad pa ritmo, tono y melodia. Musica como un dje actividadnan cultural

10 Inteligencianan Musical-ritmico y harmonico, Visual-espacial, Linguistico-verbal, Logico-matematico, Corporal-kinestesico, Interpersonal, Naturalista, Existencial, Inteligencia adicional (inteligencia docente-pedagogico y inteligencia digital).

ta sumamente importante pa ta den Enseñanza;

E funcion di Centronan di Bario mester ser restaura unda ciudadanonan di tur edad y sexo por participa na actividadnan cultural;

E sector cultural falta hopi specialista den e ramo aki, pa cual motibo ta importante pa stimula studiantenan pa escohe un carrera den e ramo aki (profesionalisacion). Importante ta pa tin un bista riba e vacaturanan / profesionnan cultural necesario actualmente, como tambe ki nivel di estudio secundario mester pa esakinan;

Rietveld Academie tabatin un impacto positivo pa Aruba y studiantenan interesa den un estudio cultural unda na Aruba mes nan por a haci (parti) di e studio aki. Esaki tambe dentro di e contexto di desaroya e *Knowledge Economy* como catalisado pa desaroyo socio-economico den e "Sistema di Innovacion" na Aruba.

FONDONAN

- Gobierno/GO's (incluyendo DCA)
- Fundacionnan (e.o. UNOCA, Prins Bernhard Fonds)
- Crea un Fondo Cultural
- Engrandece Participacion di Sector Priva

Parti di e fondonan pa cultura ta bin di gobierno. DCA (GO) tambe tin cierto fondo cu por ser uza cu un peticion adecua y

segun cierto criterio. Semper cultura su porcentahe riba nos presupuesto nacional tabata hopi abou. Algun aña pasa e tabata 0.6% y lo ta bon pa sondea e posibilidad pa hisa esaki cu p.e. 1%;

Tin diferente fundacion cu ta subsidia proyectonan cultural, pero no ta facil pa logra esaki, como cu pa skirbi un peticion ta rekeri cierto conocimiento cu por forma un obstaculo, mientras cu tin basta actor den e mundo cultural cu ta trata di haya subsidio of sosten financiero dje mesun fondonan limita;

Den e sector cultural semper pa yega na fondo ta forma un reto. Involucrando e sector priva mas activo den e mundo cultural y proyectonan cultural (creativo), por crea un *synergy* entre e dos sectornan aki unda cu por cristalisa sosten financiero pa proyectonan cultural.

CULTURA Y DESAROYO ECONOMICO

- *Cultural and Creative Industry (+ Knowledge Economy + Innovacion)*¹¹
- *Nation building*
- *Nation branding*
- Producto Turistico
- Crea Experiencia Cultural
- Turista Cultural
- "Capital Cultural di Aruba – San Nicolas"

Diversificando e economia Arubano desaroyando un *Cultural & Creative Industry (CCI)* (Industria Cultural y

¹¹ E necesidad pa reconoce e rol di innovacion, conocimiento y creatividad pa expande potencial economico pa desaroyo socio-economico sostenibel ta inevitabel. Aruba tin un *Creative Industry* poco desaroya y ainda esaki no ta stabil, locual ta haci'e dificil pa wak e *synergy* entre e Creatividad, Conocemento y Innovacion (*Creativity, Knowledge and Innovation*). Pa e motibo aki ta importante pa stimula e *synergy* aki acelerando innovacion na Aruba den tur nivel durante e siguiente añanan. Esaki ta inclui atencion na areanan manera Educacion, Strategianan di Innovacion Nacional, desaroyo di Derecho di Propiedad Intelectual y Inversion Stranheria Directo, creando un ambiente economico apto pa e economianan aki, reforsando e espiritu empresarial (entrepreneurship), e talento y desaroyo di habilidadnan y innovacion social.

Creativo), ta toca temanan manera crea cupo di trabou, preservacion sostenibel di nos herencia y cohesion social. Pa prome biaha CCI por crea cohesion den desaroyo socio-economico di nos isla basa riba e aceptacion genuino di un identidad cultural inclusivo. E lo por inicia miho comprendemento pa e necesidad pa rehuvenecimento cultural tumando e contexto multicultural Arubano na cuenta. Lo ta e prome “industria” cu lo genera entrada, mientras ta atende cambianan social den e economia Arubano. Den e situacion financiero y social actual di Aruba, cu e desaroyo di e CCI, nos isla por ta sigur cu esaki lo aporta positivamente na un desaroyo sostenibel pa nos sociedad, incluyendo tur ciudadano. Cultura y Creatividad mester ta e curason di nos desaroyo sostenibel;

Lo introduci un *Pilot Project CCI* pa artista cu tin problema pa por traha of haya trabou den un forma similar na FASE. Akinan por ricibi un suma mensualmente, bou di e condicion cu pa luna ta crea un obra di arte cu lo ser evalua pa un *Quality Control Committee*. Lo huur e obranan na empresanan cu lo expone esakinan.

Nation Building ta e proceso activo elaborando un identidad nacional cu simultaneamente ta reconoce ambos e diversidad cultural y “sincretismo”. Ta importante pa reconoce tur nacion na Aruba (Aruba globalisa: mas di 100 nacionalidad) unda cultura ta hunga un rol cardinal. Na nos isla nos herencia indigena ta central den e proceso aki, aunke na prome bista esaki no ta visibel;

Nation Branding ta enfoca riba midi, construi y maneha e reputacion di un pais. E ta e aplicacion di concepto- y tecnicanan di mercadeo corporativo pa otro pais, cu e meta pa mehora su reputacion den relacionnan internacional. Hopi biaha e meta ta pa crea relacionnan entre

actornan cu no ta limita na nacion. E ta extende pa e sectornan publico y priva y ta yuda cu nacionalismo. Alabes nan kier participa na proyectonan multi-lateral. Un forma ta incrementa e importancia di e balor simbolico di productonan cu ta enfatisa e caracteristicanan unico di un pais y ta mesun importante cu locual nan ta produci y bende realmente (*country of origin effect*). E imagen y reputacion di un pais por dramaticamente influencia su vitalidad economico. Nan ta trata di atrae turismo y capital di inversion, incrementa exportacion, atrae un forza laboral talentoso y creativo, y mehora su influencia cultural y politico den mundo. Na Aruba nos iconografia di biyete bancario (moneda), nos herencia indigena, idioma y Parke Nacional ta caracteristicanan unico di nos pais cu por y ta ser uza pa e meta di *Nation Branding*;

Nos potencial cultural ta sumamente grandi, no solamente pa su indole unico, pero tambe pa e creatividad Arubano y alabes diversidad cultural di nos isla. E producto turistico aki no ta completo sin cu e bishitante (incluyendo e propio Arubiano) por experiencia cu tur su 5 sentinan na un forma personal con unico e cultura di nos pais ta;

Aruba por bira un centro cultural den Caribe uzando e.o. *Nation Branding* y percurando pa trece eventonan cultural di importancia na nos isla. Ta comproba cu *leisure tourists* di Estados Unidos cu ta participa na actividadnan cultural Arubano of di nos herencia, di averahe ta gasta 63% mas cu otro *leisure tourists*;

A cuminsa un desaroyo pa haci di San Nicolas e “Capital Cultural di Aruba”. E idea aki no tabata malo y lo ta importante pa finalisa y/of sigui cu e desaroyo aki, teniendo na cuenta cu e CCI lo aporta na e desaroyo socio-economico di San Nicolas.

RECONOCE Y FORTALECE NOS PASADO Y DIVERSIDAD CULTURAL

- World Heritage List (UNESCO)
- Personanan cu a Impacta Nos Pasado (prome cu 1900)
- Reconoce Culturanan cu Durante Hopi Aña ta Parti di e Identidad Arubano

Un parti importante pa *Nation Branding*, pa nos producto Arubano y pa nos propio identidad, ta pa cierto aspecto di nos herencia material y inmaterial por ser reconoci pa UNESCO. Ciertu aspecto di nan tin un balor universal y una bes acepta, e lo ser poni riba e asina yama *World Heritage List* cu ta un *boost* enorme pa e cohesion socio-economico y identidad di nos pais. Den pasado a trata di yega na esaki, pero no a entrega e peticionnan na e forma mas fuerte, pero sigur p.e. cierto area cu sitionan di Dibuhonan/Pinturanan Riba Baranca (un parti importante di nos prehistoria y patrimonio cultural arkeologico), tin tur característica pa por ser poni riba e *World Heritage List*;

Durante e historia humano di Aruba cu ta encera 3500 aña, hende di diferente pais a impacta nos isla, pero mayoria a ser lubida. Atencion mas tanto ta bay pa nos historia recién (despues di 1900). Un ehempel ta Andres Tromp, e prome fiscal di Misa Santa Ana (1777/1778), cu tabata alabes e Capitan dje Indiannan Arubano y a encabesa e prome revolucion indigena contra e opresornan Europeo na 1795. Un estatua/monumento pa reconoce e personahe aki ta hopi importante pa demarca e suceso historico aki, pa conscientisa Aruba di nos pasado y pa fortifica nos identidad (otro ta p.e. Virginia Dementricia cu ta e esclabo mas rebelde den nos historia);

Un otro parti importante pa *Nation Building* ta pa crea sincretismo entre e diverso culturanan unda nan ta inclusive den nos identidad actual, reconociendo nan aporte na nos cultura y dunando nan e homenahe cu nan merece.

Deporte hopi biaha tin un posicion clave riba agenda personal di hopi persona, pero tambe riba esun social. Riba nivel personal e ta liga cu emocion y ta un guia importante den bida. Deporte tambe tin un balor social. E ta percura pa integracion y socialisacion y por refleha proporcion/ relacion social. Alabes e ta duna hobennan e posibilidad pa haya nan caminda den un sociedad. E ta crea un *network*, confiansa den su mes y den otronan, locual ta conduci na un kapital social, ambos riba nivel individual como tambe riba nivel social. Tur miembro di nos sociedad, di mucha te na esnan riba 60 aña, mester por tin e oportunidad pa por practica deporte.

DEPORTE

AREANAN DI ATENCION: PIRAMIDE DEPORTIVO

- Deportenan Masivo
- Deportenan Recreativo
- Deportenan Escolar (wak punto H)
- Topsport/Elite (wak punto I)

Ta importante pa stimula / motiva, promociona, engrandece y enrikece tur e diferente areanan deportivo di e Piramide Deportivo;

Alabes mester crea conscientisacion di e importancia cu deporte tin relaciona cu nos salud, ambos fisico y mental;

IBISA¹² mester tin un rol central den esaki;

Federacionnan, ambos miembro y no-miembro di sea Aruba Sport Unie (ASU) of Comité Olimpico Aruba (COA), mester por haya e sosten maximo pa por desaroya e practica di nan deportenan.

GRUPONAN DI ENFOKE

- Tur Edad
- Tur Sexo

Esaki ta inclui nos deportistanan cu limitacionnan fisico y/of mental;

Un grupo cu mester di atencion special ta esun di 60+, cu pa e estado fisico y mental ta hopi importante pa por tin acceso na practica deporte y cu esaki ta ser brinda na nan.

- Tur deporte na Aruba

Esaki nifica tur deporte existente na Aruba, sea cu e deporte ta reconocio of no pa Comité Olimpico Internacional, ta miembro di ASU y COA (*sportvereniging*), pero tambe esnan cu no ta afilia na esakinan (p.e. fundacionnan cu no a ser acepta ainda of ta recreativo y hasta competitivo, pero cu no por of no ta interesa pa ta miembro di ASU of COA);

E deportenan por ser dividi den esnan cu ta ser practica den forma “individual” y esnan cu ta ser practica den “conhunto”. E practica di ambos tipo di deporte tin beneficio specifico den e desaroyo y bida di un individuo;

Alabes e deportenan por ser dividi den esnan Fisico y esnan Mental.

PROFESIONALISACION SECTOR DEPORTIVO

- Capacitacion/*upgrading* Dirigientenan Deportivo
- Estudio pa Deporte como Profesion

Ta importante pa capacita mas dirigente deportivo (p.e entrenador, arbitro, scorer, ehecutivo) posibel relaciona cu e diferente deportenan dje Piramide Deportivo. Hopi biaha ta trata di boluntarionan cu ta traha duro, pero falta conocimiento deportivo, teoretico y didactico/pedagogico;

Mester stimula pa involucra y recluta boluntario, ya cu hopi biaha tin escasez di dirigente;

Formacion di “agentenan” deportivo pa guia deportista di “alto rendimiento” ta un

area cu poco interes a haya den pasado, pero e ultimo añanan mas y mas hoben ta hayando oportunidad pa studia cu beca of tin potencial y mester haya guia adecua;

Banda di por haya un carrera profesional como deportista, esaki tambe por como docente deportivo (*gymleraar*).

FACILIDADNAN DEPORTIVO

- Facilidadnan Deportivo y Unda por Entrena (inclui edificio, tereno, club y aire liber)
- Complehonan di Federacionnan (incluyendo particular/priva)
- Complehonan Deportivo Maneha pa FFD¹³
- Centronan di Bario
- YMCA

E calidad di facilidadnan deportivo mester atencion continuo. Facilidadnan deportivo mester di mantencion, ekipo di entremamento y *upgrading*. Esakinan mayoria biaha ta depende di subsidio (via ASU, COA, Ministerio di Deporte, fondonan internacional y *fundraising*), mientras un parti ta cay bou maneho di FFD;

E funcion di Centronan di Bario mester ser restaura unda ciudadanonan di tur edad y sexo por practica deporte;

Tin dos YMCA (fundacion) cu ta brinda diferente actividad deportivo y ta importante pa sostene y promove nan unda cu por;

No tin un Centro di Deportenan Mental na Aruba, aunke clubnan ta existi, pero mester carga gastonan di huur y no semper tin lugua adecua pa esakinan. Centronan di Bario den pasado tabata ser uza pa e

deportenan aki, pero no ta un lugua a largo plazo cu ta duna siguridad pa por sigui practica;

Crea canchanan deportivo den nos barionan di p.e. mini-futbol, mini-baseball, beach tennis. Tin algun cu via fondonan di organisacionnan internacional a ser subsidia.

FONDO / SUBSIDIO

- Crea un Fondo pa Deporte
- Stimula Sector Priva pa ta Involucra cu Deporte

Den pasado diferente partido politico a vocifera cu kier crea un Fondo pa Deporte, cual te awe no a sosode. Ta importante pa sondea e posibilidad aki cu por aporta grandemente na mehora nos pais uzando deporte como instrumento (den pasado tabatin e idea pa fiha un porcentahe di e *casino drop tax* pa un “Fondo pa Deporte”);

Placa semper ta un reto den deporte y ta importante pa involucra e sector priva activamente den eventonan/actividadnan deportivo, ambos riba nivel nacional y internacional. Esaki ta benéfico pa e deportista, como tambe pa e sector priva;

DEPORTE Y DESARROYO ECONOMICO

- *Nation Building*
- *Nation Branding*
- Centro/Hub Deportivo den Caribe

E sentimento di nacionalismo ta directamente liga na *Nation Building*. Banda di religion, deporte ta e unico “hilo” cu ta uni hende y ta yuda desaroya

e sentimento di patriotismo y unidad. E ta construi y defini e caracter di un nacion y ta yuda cualidadnan manera disciplina, determinacion, teamwork y un pasion pa fitness den e psyche (“totalidad di e mente humano”) di un nacion. E ta yuda guia e hubentud den e direccion adecua, ta yuda den construi infraestructura y ta crea un comunidad global;

Lo bin cu un *Pilot Project CCI* inicial cu eventualmente lo inclui e 600 artista cu tin problema pa por traha of haya trabou den un forma similar na FASE. Akinan por ricibi un suma mensualmente, bou di e condicion cu pa luna ta crea un obra di arte cu lo ser evalua pa un *Quality Control Committee*. Lo huur e obranan na empresanan cu lo expone esakinan;

Nation Branding ta un proceso unda e imagen di un pais por ser crea, monitoria, evalua y proactivamente maneha pa mehora of engrandece e reputacion di un pais na un publico (di enfoke) internacional. Esaki por ta un reto pa paisnan den desaroyo (p.e. SIDS).

Deporte ta ser mira como un instrumento pa *Nation Branding*. Esaki especialmente pa deportenan den cual e pais ta resalta y ta saca bon resultado. E por bira e imagen di un pais, sea un deporte specifico, of (un) individuo(nan) cu ta resalta internacionalmente den un ramo di deporte;

Aruba tin e infraestructura presente pa por organisa eventonan deportivo grandi (proyectonan innovativo y hasta *Mega-Events*) cu por aporta na nos desaroyo economico (e.o. turismo) y na e concepto di *Nation Branding*. Aruba tin un bentaha grandi riba otro paisnan den Caribe relaciona cu su accesibilidad aereo facil, un clima favorabel henter aña, criminalidad abou, y estabilidad politico;

DEPORTE Y SALUBRIDAD PUBLICO

- Curpa (fisico) sano
- Mente sano
- Nutricion

Deportenan fisico tin un influencia directo riba salud fisico di e ser humano (p.e. nan ta combati enfermedadnan cronico);

Deportenan mental tin un influenci grandi riba bo desaroyo cognitivo cu ta preveni y alivia cierto malesa (p.e. demencia, ADD/ADHD, depresion y adiccion);

Deportistanan en general tin bon bista riba nan nutricion, aunke tin un diferencia entre deportenan fisico y mental, mientras hopi biaha e disciplina dietario ta liga na si bo ta practica un deporte riba nivel recreacional of competitivo;

DEPORTE Y ENSEÑANZA

- Curiculo
- Tra'i merdia / Actividadnan Extra Curricular
- Olimpiada Escolar
- Estudio pa Deporte como Profesion

Deporte mester tin un luga importante den programa y curiculo di scolnan basico y secundario pa motibonan trata den e puntonan anterior. Parce cu no ta semper *gymleraar* ta duna *gymnastiekles* y alabes un cantidad substancial di scol na Aruba no tin un edificio/area adecua pa haya *gym* (deporte). Ta importante pa esakinan ta presente y pa hendenan capacita guia e hobennan riba tereno deportivo y pa e ramo aki haya e luga cu e merece den nos sistema di enseñanza;

Den trai'i merdia deporte ta ser duna, pero no ta prominente den su programanan y alabes no semper ta ser duna pa specialista di deporte – actividadnan extra curricular tin deporte inclui;

Olimpiada Escolar ta importante pa keda den programa anual di enseñanza. Lo ta interesante si por rebiba e torneonan inter-insular entre e campeonnan di e islanan di Reino Hulandes Caribense.

CENTRO DI ALTO RENDIMIENTO

- Compleho Multi-Funcional
- Acuerdo cu Scol
- Acuerdo cu Trabou
- Acuerdo cu Mundo Medico (Salubridad Publico)

Aruba tin un gran potencial den hopi deporte unda talentonan grandi a demonstra esaki riba nivel internacional, sigur durante e ultimo 10 año. Lamentablemente den nos sistema escolar deporte no tin e luga prominente cu e tin na otro pais. Tampoco ta existi un structura permanente cu ta duna e talentonan aki e posibilidad di ser guia den un forma profesional pa yega nan top. Mayoría pais tin asina yama “Centronan di Alto Rendimiento” unda segun e criterio dje pais, cierto deporte y deportista ta ser selecciona y ta cay den un programa di Alto Rendimiento. Hopi biaha e Centro di Alto Rendimiento ta ubica den un compleho multi-funcional y aunke na Aruba no tin uno moderno suficiente grandi, si tin un infraestructura existente cu por ser uza pa un programa pa atletanan di alto rendimiento;

Pa talentonan / deportistanan di Alto Rendimiento por eherce nan deporte na un forma profesional, mester tin e espacio

y tempo pa por haci esaki debidamente. Por medio di acuerdonan cu scol y trabou, por brinda e espacio aki unda na un forma adapta, por eherce deporte y alabes sigui scol y/of trabou;

Acuerdonan cu e mundo medico (Salubridad Publico) ta importante pa asina e deportista por tin guia y tratamiento medico adecua relaciona cu e deporte cu e ta eherce;

Diferente partido politico den pasado a papia di e tema aki, incluyendo pa aloca fondonan pa por duna beca na deportistanan cu hopi potencial, pero esaki nunca a cristalisa. Regularmente deportistanan Arubano di diferente ramo di deporte ta haya beca pa bay studia, pero esaki ta ser duna pa e *College of Universidad* na cual e persona aki ta bay studia;

Tin hopi evento nacional y internacional na cualnan nos talentonan mas grandi por competi y cualnan ta ser subsidia pa LOTTO pa Deporte. Un evento internacional cu ta ser subsidia pa gobierno ta e Weganan di Reino cu pa hopi año a fungi como un plataforma di indole internacional y ta importante pa sigui organisa nan, ya cu un tempo a cancela esaki.

MANEHO INTEGRAL Y SOSTENIBEL

- *Corporate Governance Code*
- Inter-Ministerial
- Multi-Disciplinario

Como cu deporte ta un ramo cu tin di haber cu diferente area y sector di nos isla, mester maneha esaki di un forma integral (conhunto);

Den pasado ambos GO's y NGO's a ser uza negativamente pa politico, a conoce interferencia politico of ta carece di profesionalismo den nan organisacion of departemanto. Pa e motibo aki ta hopi importante pa nan cumpli cu e *Corporate Governance Code*;

Riba nivel gubernamental, deporte mester forma parti di un maneho inter-ministerial riba un nivel multi-discipinario pa por yega na un calidad progresivo maximo di e ramo aki, ya cu tin diferente ministerio, departamento y disciplina (profesion) envolvi.

MEDIO AMBIENTE, DESARROYO DURADERO Y BIENESTAR DI NOS ANIMALNAN

E ciudadano di Aruba, su yiunan y nietonan tin derecho pa biba den un ambiente limpi, sigur y saludabel. Un ambiente cu ta sostene especienan y biodiversidad di ecosistemanan.

Un ambiente cu ta conserva su herencia cultural y natural y na unda desaroyo economico ta den balans cu e bienestar di tur ser y medio ambiente.

Pa por logra esaki, Accion21 tin e siguiente puntonan di enfoke:

- 1. Mihor proteccion di nos Medio Ambiente, Flora y Fauna**
- 2. Maneho di Desperdicio Responsabel**
- 3. Energia Sostenibel**
- 4. Desaroyo Sostenibel y Duradero**
- 5. Bienestar di Nos Animalnan**

Compromisonan cu Metanan di Desaroyo Sostenibel (SDG)

Aruba mester sigui su compromiso cu e Metanan di Desaroyo Sostenibel. Nan ta reconoce cu caba cu pobresa y otro dificultadnan mester bay conhunto cu strategianan pa mehora salud y enseñansa, reduci desigualdad y encurasha crecimiento economico - mientras ta combati cambio climatico y traha pa preserva nos lama y mondinan. Sostenibilidad no mester ser considera un cartera separa pero henter gobierno mester ta enfoka ariba su implementacion.

E estudio di 2018 "*SDG Baseline Measurement*" a señala cu e reto mas grandi pa haci progreso significativo ta rekeri atende cu e falta di data y compartimento di data entre e diferente institutonan di gobierno. Accion21 ta comprometi cu '*open data*' y lo sigura di implementa acuerdonan pa comparti data entre diferente instancianan di gobierno y NGOs. Mas cu esey e estructura di e comision di SDG lo sigui y fortifica door di finalisa e lasonan necesario cu academia y sociedad civil (NGOs).

E Global Sustainable Development Report (GSDR) di Nacionnan Uni a detaya cu apesar di esfuersonan global, mundo no ta na caminda pa cumpli cu e fecha di cumplimiento 2030. Cuatro aspecto ta obstaculisa e progreso di cumpli cu e metanan SDGs; aumento den desigualdad, cambio climatico, perdida di biodiversidad y cantidadnan aumentando di desperdicio humano; exactamente algun di e mesun retonan cu Aruba ta enfrentando. E rapport GSDR tambe ta señala e necesidad pa subi conscientimento

ariba e interdependencianan entre e diferente SDGs, trahando unicamente ariba un solo meta (p.e. SDG 9) por ta detrimental pa yega un otro meta (SDG 13). Como un pais isleño chikito, Aruba tin e potencial pa mihor compronde y proyecta na mundo e interdependencianan entre e SDGs, atencion special na balansa e metanan lo ta un prioridad.




Figure 1: https://sustainabledevelopment.un.org/content/documents/24797GSDR_report_2019.pdf



MIHOR PROTECCION DI NOS MEDIO AMBIENTE, FLORA Y FAUNA

Proteccion di nos medio ambiente, flora y fauna ta laga hopi di desea. Na e momento aki no tin un ley di medio ambiente (*milieuwet*) pa por garantiza un desaroyo den balans cu nos medio ambiente y bienestar general di nos ciudadanonan.

INTRODUCI Y IMPLEMENTA MILIEUWET

Pa por crea un isla dushi pa biba pa nos ciudadanonan, nan yuinan y nan nietonan mester percursa pa finalisa y introduci un ley marco di medio ambiente di Aruba, pa asina por frena desaroyo descontrola. Di e forma aki lo por regula y crea e condicionnan necesario pa por realmente tin desaroyo responsabel, sostenibel y duradero. E ley aki lo ta un punto di atencion urgente mirando cu Aruba ta un di e paisnan mas popula den region, y e uso di espacio mester wordo bon regula. E ley lo inclui tambe sancionnan pa infraccionnan cu keda hasi.

INTRODUCI Y IMPLEMENTA PARKE MARINO

Revisa y implementa e ley di Parke Marino pa asina tambe por proteha bida maritimo manera entre otro nos coralnan, rifnan, mangroves, pisca, turtuga y tur otro bida maritimo. Financiamiento sostenibel por wordo genera por medio di por ehempel *Blue Finance*, *Carbon Credit Off-set*, fondonan Europeo, pero tambe tur esnan cu ta hasi uso turistico di e zonanan aki (*divers marine tag*).

MEHORA E CALIDAD DI NOS AIRE

Stimula mas plantacion di mata local cu ta duna sombra por ehempel den ciudad y barionan. E matanan lo duna mas cu sombra, ya cu nan lo percursa pa un miho calidad di aire como resultado. Introduci tambe regulacion pa por midi polucion den aire di proyectonan cu tin uitstoot directo den aire liber pa asina percursa cu nan ta atene na normanan reconoci mundialmente.

MANEHO DI DESPERDICIO RESPONSABEL

Pa por logra un mihor solucion pa desperdicio mester bay pensa den termino di economia circular. Esaki kiermen cu lo mester evalua e tipo di desperdicio cu ta wordo produci y con esaki por wordo sea recicla, re-usa of reduci. E ciudadano, pero sigur e sector comercial tin nan responsabilidad den esaki pa por yega na solucionnan duradero. Den termino corto mester haci un cambio drastico den e sistema y separa e recoleccion y e procesamento di sushi.

CERA PARKIETENBOS Y ENFOKA RIBA REDUCI, RE-USA Y RECICLA

Cera Parkietenbos y cap e area pa asina por usa esaki pa otro proposito duradero manera por ehempel un parke solar, of cualkier otro proposito na beneficio di e bario. Lo evalua e diferente forma di deshaci di diferente tipo di desperdicio unda cu reduci, re-usa y recicla lo ta central. Aki por pensa por ehempel riba:

- re-introduccion di statiegeld pa boternan di glas of blekinan
- recicla y re-usa tur tipo di desperdicio
- un incinerator chikito special pa desperdicio medico na hospital mes
- un incinerator pa cadaver di animal na abattoir (manera tin na moratorionan)
- duna espacio pa compañia por re procesa tire pa uso di crea azeta, carbon black pa caretera, trottoir y/of otro procesonan cu lo por wordo compra door di sector publico
- usa foyonan di mata pa crea compost pa sigui planta.

MIHO COORDINAY HACI MASEFICIENTE E RECOGEMENTO DI SUSHI:

- Concesion di rutanen di recogemento di sushi lo ta duna via un bidding process pa distrito, companianan mester percira pa tur e barionan ta limpi (inclusief e terenonan bashi).
- Mini caya di medio ambiente den tur barrio.
- Introduci servicio di cobra pa piki sushi di cas via cuenta di awa. Incluyendo tur companianan den e tarifa minimo.

RENOBA RWZI / BUBALI PLAS

Pone prioridad pa drecha RWZI cu ta data desde 1975 y cu ta trahando dobel su capacidad, esaki mester wordo drecha cu urgencia. E costo pa un planta nobo ta alrededor di 60 miyon florin y lo por wordo financia por medio di privatiza e planta, y unda lo inverti, opera y haci e mantencion di e planta. Esaki lo wordo hasi por medio di un destaho publico siguiendo un mecanismo di modelo RAB (*Regulated Asset Base model*), e mecanismo aki ta implementa exitosamente caba na Boneiro den e regulacion di *utilities*. Esaki lo no trese gasto adicional pa Land, pero si e solucion urgente y necesario pa e area di Palm Beach cu ta haci uso di e planta aki. E lo aumenta e capacidad, drecha e planta cu ta deteriora, percira pa no tin mal holo y evita un desaster di desperdicio.

BAHA E CONSUMO DI COMBUSTIBEL FOSIL

(ENERGIA SOSTENIBEL Y MEHORAMENTO DI TRANSPORTE)

Mirando cu Aruba ta un isla bendiciona cu biento y solo tur dia, pero tambe ta rondona pa lama, nos tin condicionnan faborabel pa sondea posibilidadnan pa por utiliza energia renobabel y di e forma aki reduci nos dependencia riba fossil fuels.

INVENTARISA E COSTO DI AWA Y CORIENTE

Haci un inventarisacion di nos plantanan nacional di awa y electricidad, como tambe e estructura di Utilities y diferente directiva, pa wak con por streamline procesonan y reduci gasto di operacion pa asina por pasa e reduccion aki pa e consumidor. E intencion di e plantanan nacional semper tawata pa por duna awa y coriente na un prijs pagabel pa e ciudadano.

TRANSICION PA AUTONAN ELECTRICO OF DI LPG/GAS NATURAL DEN SECTOR PUBLICO

Converti e flota di auto di sector publico pa autonan electrico usando *charging stations* solar. Di e forma aki duna ehempel di con por contribui na uso di energia renobabel y reduci emision di CO2 riba nos isla. Busca manera di reduci costo di vehiculonan pisa (manera Trucks and Vans) cu posibilidad di converti nan na gas natural of LPG. Accion21 ta kere cu nos mester tambe prepara e regulacion pa no perde den e posibilidadnan cu otro fuentenan di energía lo por brinda na nos isla.

INCREMENTA POSIBILIDADNAN DI PRODUCCION DI ENERGIA RENOBABEL

Aumenta "*distributed generation*" bahando algun di e restriccionnan riba *net metering* pa cantidad di solar panels ariba daknan y aumenta facilidadnan pa financiamiento di *solar panels* pa tur Arubano por beneficia di e innovacion global den energia. FCCA lo por instala parke solar den forma di carports den un cooperacion cu habitantenan di casnan social pa yuda baha gastonan di coriente. Accion21 lo hasi un evaluacion abierto di e rol di gobierno den habri un *utility* nobo pa maneha un sistema *District Cooling* pa e area di hotel y asina baha drasticamente e cantidad di petroleo cu nos ta importa. Gobierno mester habri e posibilidad di nicho-nan di innovacion den energia pa stimula capital priva pa tuma risico den instalacionnan innovativo.

TRANSPORTE PUBLICO

E sistema di transporte publico no ta wordo bon utiliza a causa di un falta di coordinacion, accesibilidad y conocimiento di e sistema. Rutanan y paradanan di transporte publico mester wordo optimalisa door di reubica algun di e centro di paradanan y añadiendo control di ruta flexible via un app. Paradanan di bus mester wordo mehora cu p.e. sombra

DESARROYO SOSTENIBEL Y DURADERO

Pa por garantisa un isla dushi pa biba pa nos ciudadanonan, nan yiunan y nietonan, nos mester pone enfoke pa crea desaroyo sostenibel y duradero. Esaki lo rekeri regulacion di parti di gobierno, pero sigur tambe participacion di comunidad.

MIHO CONTROL DI PROYECTONAN DI INFRASTRUCTURA

- Introduccion di un Comision M.E.R.: Na e momentonan aki un di e rekisitonan pa proyectonan nobo ta pa entrega un m.e.r. rapport pa por evalua e efectonan medio ambiental di e proyecto riba e area unda kier construi of desaroya. Actualmente Aruba no conoce un comision di experto independiente (manera na Hulanda) cu ta determina e rekisitonan pa e rapportnan aki, ni tampoco cu ta controla e contenido di dicho rapport. Esaki ta causa cu hopi biaha e desaroyador di e proyecto ta laga traha e rapport aki, pero realmente e lo no haña resistencia, pasobra e no ta wordo debidamente controla. Den cuadro di desaroyo sostenibel y duradero lo evalua si lo introduci un comision m.e.r. pa Aruba of busca colaboracion cu esun existente na Hulanda pa crea un comision pa Caribe.
- Actualisa tur contrat di infraestructura cu un enfoke ariba mantencion adecuado di instalacionnan (scolnan, instalacion RWZI, sistemanan di procesa desperdicio, sistemanan di energia etc).

TRIPLE HELIX APPROACH: GOBIERNO LO PERCURA PA SUBI COLABORACION CU SECTOR ACADEMICO Y SECTOR CIVIL

Hunto cu e facultad di SISTEM di Universidad di Aruba y otro NGOs gobierno lo por haci sondeo den naturalesa mirando nos clima. Esaki lo brinda e universidadnan un espacio pa haci nan investigacionnan, pero tambe lo por sigui brinda nos studentenan oportunidadnan na Aruba mes den ramo di sostenibilidad.

Enfoka ariba e eliminacion di contaminantenan riba tera, incluyendo un inventario y regulacion di fertilisante y pesticida.

RE-URBANISA ORANJESTAD Y SAN NICOLAS

Tin hopi edificio bashi of cu no ta wordo usa optimalmente cu lo por wordo usa pa por ehempel vivienda pa estudiante of *young professionals* den centro di ciudad. Esaki nan por ta vivienda pagabel cu lo trece bida bek den e centronan di ciudad. Por pensa na por ehempel muda edificio di postkantoor y re-usa esaki como vivienda pa estudiante mirando e parkeo grandi, pero tambe su cercania na Universidad di Aruba. Asina tin hopi otro areanan na Aruba cu por wordo utiliza pa vivienda, particularmente si considera e scarsedad di tereno.

ACCION21 CU CITY INSPECTOR (SDG 6, 11, 13, 15, 16)

City Inspector ta hunga un rol importante den mantencion di nos medio ambiente. Nan ta e frontline workers pa nos medio ambiente. Accion21 lo desea di wak e peso di ley ta un tiki mas pisa pa esnan cu ta comete destruccion y polucion di medio ambiente. Accion21 lo cambia e nomber di City Inspector pa Inspector ambiental pa preveni e percepcion cu su responsabilidad ta unicamente den stad.

- Cambio den Ley pa facilita otorgamento di boet y e pruebanan necesario pa duna nan lo ta un prioridad halto.
- Pa 5 te cu 10 aña ta reforsa Dep. City Inspector cu mas personal cu autoridad policial, training y ekipo pa reorienta riba ley *hinderverordening*.
- Lo controla den oranan iregular tambe manera anochi y den weekend pa delitonan di medio ambiente, molester y abuso di bestia (di cas)
- Lo evalua si lo lanta un bureau di recherche di medio ambiente pa investiga delictonan ambiental.
- Introduci un sistema di permiso anual pa vehiculo of machine of otro instalacion bandona cu no ta cuadra cu e *bestemmingsplan* di tereno.
- Lo midi e efectividad di "*Milieu Samenwerkingsteam*"
- Lo incorpora City inspector den Departamento di Naturalesa y Medio Ambiente.
- Incorpora Arubus parkeerwachters den Dept City inspector.

BIENESTAR DI NOS ANIMALNAN

E animalnan di Aruba tin años ta sufriendo riba caya y riba tereno priva. Nos responsabilidad ta pa proteha nos animalnan y percura pa nan tin un bida digno riba nos isla. Un bida sin sufrimiento of maltrato.

Pa por logra esaki, Accion21 tin e siguiente puntonan di enfoke:

- Mihor proteccion pa tur nos animalnan
- Educacion
- No mas reproduccion
- Percura pa barionan ta mas sigur
- Prohibi peleanan di cacho (*dogfights*) y di gai (*cockfights*)

MIHOR PROTECCION PA TUR NOS ANIMALNAN

Nos animalnan mester wordo proteha pa ley. E ley tey pero e no ta wordo enforsa. Abuso di bestia ta un delito

- Percura pa ley wordo enforsa Polis hunto ku BCI (Bureau City Inspector) tin cu subi caya pa controla con nos animalnan ta wordo trata. Si ta tuma nota cu tin abuso mester otorga boet. Sin boet nada no ta cambia. Si nos no ta reparti boet nos lo ta bisando cu e abuso contra animal ta un fenomeno aceptabel. Esaki nos kier mira cambio aden.
- Zorg pa tin registracion. Tur animal mester wordu gechipped y registra den un database. Den e database mester tin ken e doño ta y cuanto cacho e tin. Mester bin un dierenbelasting pa

percura ku doñonan ta consciente ora nan tuma un mascota.

- No mas actividadnan ilegal ku nos animalnan. Mester bin “boet” of “Celstraf” ora tin actividad ilegal mane pelea di cacho of pelea di gai. Inclui prohibicion di peleanan di cacho of di gai.
- Breeders mester wordo registra y controla door di BCI. Un breeder no mag di tin mas cu un camada pa año di un cacho. Breeders mester registra na KvK paso ta un fuente di entrada cu nan ta recibi.

EDUCACION

E hubentud tin cu trece e cambio. Den tur skol mester cuminsa duna les den con mester trata tur animal. Abuso di animal casi semper ta bay hunto cu abuso di mucha. Percura pa e les ta un parti di e curiculo di tur skol. E parti social den klas.

Drenta e barionan pa educa nos hende con pa cuida nan mascota.

Den e barionan na e Centro di Bario of MFA mester tin un punto pa por meld abuso di bestia of si mester ayudo y guia pa cu e cuidado di nan mascota.

NO MAS REPRODUCCION

Nos tin demasiado cacho/pushi na nos isla. Nos tin cu cuminsa reduci e reproduccion. Esey por cuminsa door di sterilisa nos mascotanan y esunnan riba caya.

Awor nos tin Stimami Sterilisami pa yuda cu e parti di steralisa. Pero per Juni 2021 nan ta stop y nos reto pa cu produccion lo conoce un aumento drastico resultando den retonan mas grandi despues. Nos tin cu enfoka riba un *sterilisatie bus* pa por drenta e barionan ku menos recurso pa cuminsa opera lo mas hopi posibel.

Nos tin CCC ku ta *bewaar plaats* pa par di cacho y pushi cu ta wordu kita for di caya of for di nan doño.

Si un cacho/pushi wordo kita for di e doño, e doño mester haña un prohibicion pa asina e nunca mas por tuma un cacho.

Si un cacho wordo kita for di riba caya nan mester tin un *bewaar plaats* mas grandi pa por tuma x montahe di cacho pa siman. Duna nan un tempo pa custumbra cu nan ambiente nobo pa despues evalua si nan por wordu adopta of no.

Animalnan brabo mester wordo poni drumi di un manera "*diervriendelijk*" y sin sufrimento.

PERCURA PA BARIONAN TA SIGUR

Mester stop di cria cachonan den bario. Si pone *feeders* na rand di tur bario cu tin problema cu cacho esey lo percura pa menos *overlast*. Fundacionnan por bin y sterilisanan pa e grupo no bira mas grandi l esunnan brabo mester wordo kita for di riba caya.

Cachonan coriendo los den mondi of Parke Arikok of bandi lama.

Si nos implementa ku tur bestia/ mester keda registra - mester wordo *gechipt* - e ora ta mas facil pa sa di ken nan ta.

Tur mester wordo gara door di BCI of CCC unit y hiba CCC na Wayaka.

Proteccion pa e neishi di turtuganan di nos beachnan.

Mester concientisa nos pueblo mas tocante e importancia di e turtuganan. Mester pone baricada y "*no-go area*" pa temporada di tortuga.

Borchinan mustrando unda e "*no-go zones*" ta.

SALUBRIDAD PUBLICO

Durante e pandemia nos retonan den cuidado a keda accentua. Ta evidente cu nos sector medico mester di atencion urgentemente. Mientras tin lista di espera largo den hopi area di cuidado, nos profesionalnan tambe mester di mas ayudo y sosten. E situacion precario di Aruba su finanzas, e pendiente recorte di Afl. 5 miyon mensual den presupuesto di AZV y e discrepancianan di remuneracion di profesionalnan medico compara cu otro partinan di Reino ta un causa di preocupacion y incertidumbre.

Nos vision ta crea un estructura di cuidado cu ta inclui cuidado preventivo caminda e pashent ta central.

- Cuidado Preventivo
- Fortificacion di AZV y DVG
- Gastonan di AZV
- Cuidado Interinsular
- Salud Mental
- Adiccion
- Legalisacion di Eutanasia
- Legalisacion di Cannabis Medicinal y Remedinan Alternativo
- Legalisa Abortus
- Introduccion di un '*Patient Bill of Rights*'
- Introduci un Patiëntenraad
- Inventarisacion di Premie pa Pensionadonan
- Acreditacion di Mediconan
- Cuidado pa Anciano
- ImSan (Instituto Medico San Nicolas)
- Innovacion den Cuidado

CUIDO PREVENTIVO - CAMBIO DI MISION Y META DI AZV

Nos kier brinda AZV cu un proposito mas amplio y cambia e '*Landsverordening Zieke-en ziektekostenverzekering*' pa sigura cu AZV lo por ofrece cuidado preventivo y no solamente curativo. Esaki lo inclui examinacion regular di pashentnan asina facilita e diagnostico mas trempan y te hasta por yuda preveni desaroyo di malesanan. Nos ta di opinion a largo plazo esaki lo reduci e gastonan di AZV y mehora cuidado pa nos poblacion.

Reino Unido su *National Health Service* ta e sistema di cuidado universal cu mas eficientemente ta cubri henter poblacion y nos lo kier replica proceduranan pa mehora cuidado y baha gasto di AZV.

FORTIFICACION DI AZV Y DVG

Nos ta kere cu e siguiente departamentonan mester di fortificacion sea door di mas fondo y/of personal.

- Gele Koorts en Muskieten Bestrijding (GKMB);
- DVG – *Department of Food and Consumer Product Inspection and Hygiene* ta encarga cu tur control na hotel, restaurant etc y nos kier fortifica e *toezichthouders* den forma di *bijtscholing*. Asina nan lo por desplega nan trabao den un forma responsabel segun *standards* internacional;
- Servicio Veterinario lo mester evalua si nan lo kier keda den servicio di DVG of si nan lo kier habri nan practica pa elimina cualkier conflicto di interes;
- Servicio di registracion di personal medico lo mester keda actualisa mas regularmente pa garantiza un mihor bista di kende ta trahando;
- Evalua *Kwaliteits Instituut Aruba* cu of bao supervision di Ministerio di Salud y Inspeccion Hulandes;
- Separa Inspeccion di Remedi for di Inspeccion di Salud Aruba (IVA) manera tabata stipula den e Ordenanza Inspeccion di Remedi prome cu IVA a keda funda;
- Fortifica Inspeccion di Salud Aruba (IVA) pa por tin un mihor bista riba calidad y siguridad di henter sector di cuidado, cu a cuminsa funciona desde 1 januari 2017;
- Introduci un rekisito pa Director di Salubridad Publico tin experiencia den mundo medico;
- Aruba mester mas *handhaving*, mester acredita *toezichthouders* pa asina por mihor controla unda fondonan ta bay, fortifica manehonan existente y introduci esnan cu falta.

GASTONAN DI AZV

Den e *Landspakket* Tema F tin sugerencia-
nan cu lo yuda baha gasto incluyendo:

- adkision conhunto di medicamento, recurso, material y ekipo [cu hospitalnan den territorio Caribense di Reino]
- capacitacion regional y planificacion di capacidad di personal di cuidado (reduccion di gasto di capacitacion mediante e reduccion di e formacion den e extranjero);
- especialista medico cu ta ofrece cuidado segura den servicio di hospital (*sterfhuisconstructie*);

Nos ta kere cu un plan di reduccion di gasto y/of mas contribucion na fondo di AZV mester inclui tambe:

- Inventarisacion di e gastonan di salario dentro di AZV
- O-meting den gastonan di huisartsen-praktijken pa evalua si por crea mas eficiencia
- Ampliacion di AZV+ unda como asegurado boloporcumpraserbicionan adicional riba pakete basico
 - Percura cu personanan di exterior no ta abusa di nos sistema di cuidado universal door di p.e. cumpra un cas y establece residencia na Aruba como e forma menos costoso di asegura nan mes
- Na momento di manda pashentnan den exterior mester crea un *behandelingsplan* cu ta continua despues di nan regreso. Mester mehora comunicacion entre dokternan local y dokternan den exterior cu ta trata nos pashentnan.
- Introduci un *behandelingsovereen-*

komst pa pashentnan cu bay den exterior cu ta detaya den ki tempo nan lo wordo trata y cu gastonan adicional di cualkier retraso atribui na e hospital stranhero lo wordo deduci di nan pago, por ehempel

- Percura cu un *Call Center* ta na altura di e pashentnan y kiko ta nan *stand van zaken*
- Dentro di loke polisanan di seguro ta permiti, stimula mihor cooperacion y comunicacion incluyendo *data sharing* entre doctornan local y den exterior
- Conscientisa pueblo tocante e costo di nan cuidado door di manda recibonan
- Modernisa leyman laboral
- Reconoce cu AZV no por sigui den su forma actual y mester studia e introduccion di un *eigen bijdrage (co-payment)* pa evita cu mester haci recorte den *basis pakket*
- Mehora educacion tocante alimentacion

E acuerdo cu Hulanda tambe ta yama pa 'racionalisa e atencion di laboratorio y reduci e cantidad di laboratorio,' nos ta kere den operacion di un mercado liber y nos lo mester wak mas estudio con esaki lo baha gasto. Adkision conhunto sigur lo beneficia tur e instancianan concerni y esaki ta algo cu nos lo kier mira implementa mas pronto cu ta posibel.

E retonan di cuidado medico den e islanan, incluyendo Aruba, ta cu pa ofrece un servicio di cuidado extensivo eficientemente mester un poblacion di mas o menos 500,000. E *Landspakket* ta tuma e posicion cu uniendo e diferente teritorionan Caribense di Reino encuanto specialisacion medico lo yega mas cerca di duplica esey.

CUIDO INTERINSULAR

'Reduci cantidad di transmision medico pa pais terciario mediante ampliacion di oferta di cuidado den territorio Caribense di Reino (cuidado specialisa superior)'

Esaki ta un meta di e *Landspakket* cu por ta contra-productivo. Ainda nos no a wak suficiente evidencia cu e islanan lo por duplica *economies of scale* manera ta posibel na Colombia, cu ta e destino di mayoria di e pashentnan cu nos ta manda afor. Mirando e falta di conexion aereo interinsular y e costo mas halto di estadia na e teritorionan di Caribe Hulandes, nos no ta convenci cu esaki lo baha gasto y/of mehora cuidado. Si nos ta kere cu mester bin mihor regulacion ora pashent wordo manda den exterior.

SALUD MENTAL

Na Aruba actualmente tin mas o menos 12,000 persona den necesidad di cuidado pa salud mental. Solamente 25% di nan ta ricibi cuidado y listanan di espera ta largo. Demanda ta hopi mas grandi cu capacidad y mayoria di e casonan lo por wordo trata pa psicologo. Nos ta kere cu ta importante:

- Profesionalisa loke nos tin
- Alcansa pashentnan acute
- Apoya dokternan di cas

Aworaki ta inaceptabel cu 7-8k hende tin derecho di cuidado pero no ta ricibi'e y cu te hasta den casonan di mucha e lista di espera ta mas cu un año.

Percura cu gobierno su *'Flexible Assertive Community Treatment (FACT)'* team ta bon ekipa cu personanan capacita pa atende cu e retonan den cuidado di salud mental.

Mester mehora e compartimento di data entre e diferente instancianan incluyendo dokternan di cas, Respaldo, FMAA y SPD. Tambe mester mehora e facilidad pa dokternan di cas por transferi pashent pa un di e respectivo instancianan.

Studia e posibilidad di centralisa cuidado pa salud mental y combina e tres instancianan, FMAA, Respaldo y SPD.

Profesionalisa estudio pa cuidado di salud mental na Aruba y hisa e cantidad di p.e. GZ psicologo.

ADICCION

Nos lo kier inverti mas den centro di rehabilitacion pa mehora cuidado pa nos adictonan. Adiccion ta un sintoma y como parti di cualkier programa di rehabilitacion mester inclui tratamiento psicologico. Tambe nos kier sigura cu tin suficiente *'halfway house'* pa brinda adictonan den recuperacion un stap intermediario pa nan saneamento y eventual reintegracion den sociedad y mercado laboral. Nos kier mira mas programa di educacion como parti di nos curiculo pa conscientisa muchanan desde un edad jong di comportamentonan adictivo y recursonan di ayudo manera gruponan di auto-ayuda.

LEGALISACION DI EUTANASIA

Den discusion tocante eutanasia mester considera pashentnan cu ta terminal y tin e deseo pa termina nan bida pa por mitiga mas sufrimento. Nos ta kere cu despues di restructuracion di nos sistema di salubridad publico, lo ta apropiado pa studia e tema di eutanasia y con mihor por structura esaki hunto cu guia y sosten pa famia.

Nos estudio científico a señala cu actualmente na Aruba 43% di nos poblacion ta di opinion cu eutanasia ta hustificabel, 31% ta contra y 27% no tin opinion. Claramente e apoyo pa introduccion di eutanasia ya caba ta existi den pueblo dus nos ta kere e siguiente pasonan mester ta:

- Haci un estudio pa determina e demanda pa eutanasia
- Crea un concepto di ley cu lo por keda introduci pa establece y regula e procedura

LEGALISACION DI CANNABIS MEDICINAL Y REMEDIAN ALTERNATIVO

Como partido Liberal Progresista nos ta kere firmemente den brinda e libertad na e individuo pa por explora tratamentonan alternativo bao guia di un profesional. Nos ta kere den ampliacion di remedian disponibel pa no solamente uso di p.e. CBD Oil y otro productonan manera remedian natural. Por ehempel, den caso di un persona cu un solo riñon ta hopi importante incorpora mas remedi natural cu ta posibel pa salvaguardia su sobrevivencia.

Na Aruba antes tabata tin un cultura grandi di curandero cu tabata haci uso di mata y otro remedi natural pa sana y sostiene personanan cu resultado positivo. Na Reino Unido e *National Health Service* ta inclui e posibilidad di tratamiento segun medicina Chines tradicional. Na Cuba ta utiliza acupuntura como parti di nan sistema nacional di salud. Nos ta kere si AZV cubri cierto tratamentonan alternativo cu a demostra di funciona y tambe remedian natural wordo miho controla por tin beneficio holistico pa nos pashentnan.

LEGALISA ABORTUS

Nos ta un partido *Pro-Choice* y ta kere cu e individuo mester tin autonomia ariba su mesun curpa. Evita abortus mester ta un meta nacional, nos ta di opinion cu e mihor manera pa logra esaki ta a traves di educacion y no prohibicion.

Nos lo kier legalisa y introduci un sistema di control cu ta garantisa siguridad di e pashent pero tambe haci e procedura castigabel despues di p.e. 16 siman pa tanto profesional medico como pashent.

Legalisacion di abortus mester wordo combina cu un structura di cuida social pa brinda e pashent tur guia y sosten pa por tuma e decision corecto pa su persona. E structura di guia y sosten mester continua despues di e proceso pa tanto e pashent como su famia si nan ta desea.

Segun nos estudio científico, actualmente na Aruba 40% di nos poblacion ta di opinion cu abortus ta hustificabel, 43% ta contra y 17% no tin opinion. Como partido Liberal Progresista nos ta kere den libertad di e individuo pa haci su mesun escohencia di kiko ta lo corecto pe.

INTRODUCCION DI UN 'PATIENT BILL OF RIGHTS'

Nos ta kere den haci e pashent central y kier introduci un Patient Bill of Rights manera ta existi na Merca pa sigura cu tur cliente di AZV ricibi:

- Informacion tocante nan tratamiento
- Acceso na servicionan di emergencia
- Respet y ningun discriminacion
- Confidencialidad
- Espacio pa haci keho, y caminda apropia cuminsa un investigacion
- Responsabilidadnan di pashent

INTRODUCI UN *PATIËNTENRAAD*

Nos lo kier introduci un *Patiëntenraad* pa sigura cu e pashent por ricibi tur informacion y tambe haci keho den casonan caminda cos no a cana manera debe ser.

Un instancia separa di AZV lo por prepara un analisis di e nivel di cuidu, sugerencianan pa mehora y tambe investiga kehonan.

INVENTARISACION DI PREMIE PA PENSIONADONAN

Nos tin un preocupacion tocante e contribucion di un grupo di pensionadonan cu mester paga un premie halto na AZV di 10,5%. Nan tin cu contribui tanto e *werknemersdeel* como tambe e *werkgeversdeel* y esaki nos ta considera inhusto pa personanan bao di un cierto entrada. Nos lo kier haci un inventarisacion y identifica si lo ta posibel reduci parti di e contribucion.

ACREDITACION DI MEDICONAN

E meta di Accion21 ta pa facilita tur hoben Arubano practica nan carera incluyendo personanan cu a studia medicina den region. Pa logra esaki nos kier introduci un ARUBIG cu ta evalua e cualificacionnan di e individuo pa sigura un continuidad of mehoracion den cuidu. Pa introduci esaki mester:

- Lanta un Instituto di Calidad, pa por registra hobennan cu ta estudiando of a studia den region cu kier eherce nan carera na Aruba
- E Instituto di Calidad lo traha hunto cu otro pais den Reino y internacional pa bin cu normanan di *best practices* pa mehora e calidad di cuidu medico y acreditacion

- Institui un comision pa investiga mas posibilidad pa facilita acreditacion p.e. manera e examen MIR na Spanje
- Cera acuerdonan cu universidadnan y facilidadnan local pa Arubanonan gradua den region por logra cualkier calificacion necesario localmente

Nos lo kier pasa un *Landsbesluit* cu ta regla cu banda di e registro BIG di Hulanda, Aruba ta reconoce hobennan medico cu a studia den otro sistemanan. Nos lo kier haci un inventarisacion ariba e siguiente ordenansanan:

- LANDSBESLUIT, di 13 april 2021 riba articulo 3, tweede lid, di e Landsverordening beroep in de gezondheidszorg (AB 2014 no. 73) Afkondigingsblad van Aruba 2021 no. 67.
- LANDSBESLUIT, 13 april 2021 tot wijziging LANDSBESLUIT di dia 11 augustus 2017 (AB 2017 no. 54) en (AB 2014 no 73) Afkondigingsblad van Aruba 2021 no 66
- LANDSVERORDENING di 15 december 2014. Afkondigingsblad van Aruba 2014 no. 73
- LANDSBESLUIT, di 11 augustus 2017. Afkondigingsblad van Aruba 2017 no. 54.

CUIDO PA ANCIANO

Expansion di AZV pa inclui cuidu preventivo lo ta instrumental den mehora cuidu pa nos grandinan. Den nos programa di Social y Labor nos ta detaya con nos kier percura un nivel minimo di cuidu incluyendo p.e. limite ariba cuanto persona pa m2 den casnan di anciano.

Mester reduci e presion ariba *eerste hulp* door di ofrece cuidu na cas y expande

orario di atencion pa inclui despues di 3:00pm y den weekend cual Wit Gele Kruis no ta cubri.

Pensionando mester wordo exclui di cualkier recorte den cubrimiento di remedi.

Gasto di cuidado di anciano ta creciendo 5% anualmente, esey ta mas cu nos crecimiento economico, ta importante pa busca eficiencianan den e sistema incluyendo:

- cuidado pa un anciano mester inicia na cas y esey mester wordo mehora
- expansion di cuidado na cas pa hospital no keda pega cu hende cu mester bay cas pero pa falta di cuidado ta keda interna
- na Aruba $\frac{1}{3}$ di poblacion ta haña demencia mientras na mundo ta 7%, mester evalua ki cambianan den nos estilo di bida por trece saneamento y reduci e incidencia local
- EPI mester yuda mehora cuidado di hendenan cu malesanan cronico
- Fortifica SABA su esfuersonan pa traha cu HOH Academy y haci e shift di MBO 4 pa HBO
- urgent care pa 65+ mester sosode na cas
- reconoce cu SABA ta ofrece un nivel di cuidado mas similar cu un hospital chikito y mester fondo stabiel
- mihor cuidado pa anciano cu limitacion
- limita capacidad na casnan di anciano chikito na p.e. 35 persona
- mihor regularisacion di casnan di anciano

IMSAN (INSTITUTO MEDICO SAN NICOLAS)

Nos ta aplaudi e desaroyonan tumando lugar na ImSan cu ta e prome hospital na Aruba y un di poco den nos region cu ta na caminda pa ricibi acreditacion JCI. Nos ta kere cu e adicon di ImSan lo por complementa operacion na HOH den cierto area y competi cu HOH den otro. Ta importante pa AZV brinda e posibilidad pa pashent scohe nan hospital di preferencia caminda ta posibel. Nos kier mira e sistemanan digital di e dos hospitalnan wordo conecta pa comparti *data* y sigura cu no tin duplicacion di esfuerzo.

INNOVACION

- Nos kier cuminsa pa cera acuerdo cu universidadnan Hulandes pa estudio di medicina pa reserva un cierto cantidad di espacio pa Aruba mescos cu nan ta haci pa Curaçao
- Nos kier introduci mas conscientisacion ariba e importancia di alimentacion, cuminsando cu programanan na skol di nutricion
- Nos kier desaroya p.e. un *diabetes center* pa pashentnan y usando tecnologia monitorea nan cuidado propio
- Nos kier expande digitalisacion den cuidado medico y sigura cu e diferente sistemanan ta conecta y comunica cu otro

INFRASTRUCTURA Y TRANSPORTE

E bon funcionamiento di economia di un paista depende hopi ariba e bon funcionamiento di su infraestructura. Un bon infraestructura ta hunga un papel hopi importante pa facilita transaccionnan empresarial, aumenta eficiencia y mehora nivel di bida.

Tin un corelacion entre e crecemento di e Producto Interno Bruto (PIB) y estado di condicion di infraestructura nacional. Falta di mantencion di nos careteranan y otro infraestructura publico a resulta den un decadencia.

Nos estudio cientifico di problematicanan di Aruba a señala cu na nivel di districto, infraestructura ta e preocupacion principal pa nos poblacion. Nos ta haña nos mes den un crisis financiero cu infraestructura cu ta menos cu optimal.

INFRAPLAN 21

- Drecha y mehora nos infraestructura nacional
- Stimula economia

Nos como partido kier desaroya un pakete di inversion gubernamental pa catch up e retrasonan y inverti den renovacion hunto cu innovacion. Esaki ta encera:

- Drecha e red di caretera
 1. Actualisa e mantencion retrasa di cayanan
 2. Asfalta cayanan di santo
- Expande acera pa peaton
- Traha mas fietspad
- Traha mas parkeerplaats
- Mehora siguridad
- Re-dirigi trafico pa mehora fluho
- Mas estimulacion pa vehiculonan electrico

WEGENBELASTING (number di auto)

Nos como partido kier mira fondonan di *wegenbelasting* (pagamento pa number di auto) wordo destina unicamente pa infraestructura. Tur aña tin un entrada di mas o menos 35 mion florin na *wegenbelasting* (number di auto) pero un fraccion so ta bay den mantencion y creacion di caminda. Nos kier garantia den ley y/of procedura cu e suma di *wegenbelasting* ta wordo inverti den expansion, mantencion y mehoracion di nos careteranan.

Tambe mester inverti den expande y haci aceranan mas accesibel pa personanan cu limitacion di movilidad. Den futuro

lo kier embecece cayanan cu arte local, muebles funcional, mihor iluminacion (specialmente na crusadanan), mihor afwatering y recobra awacero.

ACERANAN

Nos kier restaura acera den un manera innovativo y sostenibel y hacinan mas accesibel pa personanan cu limitacion di movilidad.

FIETSPAD

Crea mas seccion di caya pa bicicleta

PARKEERPLAATS

Expande demarcacion unda vehiculo por *parkeer* riba caya

SIGURIDAD

- Amplia iluminacion
- Iluminacion *oranje* na crusadanan segun ley
- Vigilancia digital via camera (CCTV)
- Mior control ariba *parkeer* riba acera

STUDIA POSIBILIDAD PA RE-DIRIGI TRAFICO Y MEHORA FLUHO

Nos a tuma nota con proyectonan manera Tram, Green Corridor, Av. Watty Vos a ocasiona cambio den uso di cayanan y trafico. Nos kier haci un estudio y efectua con trafico por wordo mior dirigi pa p.e. mehora actividad den caya grandi Oranjestad y San Nicolas.

STIMULACION PA VEHICULONAN DI CORIENTE

- Amplia stacionnan di recarga na punto
nan strategico y den *parkeerplaats*
- Zonifica *parkeerplaats* preferencial
auto electrico

TRANSPORTE PUBLICO

Nos ta kere den inverti pa fortalece y mehora nos sistema di transporte publico. A largo plaso un sistema di transporte publico lo trece beneficio no solamente pa medio ambiente y economia pero tambe ta cumpli cu un responsabilidad social pa garantisar movilidad eficiente pa tur. Aumenta uso di transporte publico ta pone menos presion ariba nos sistema di caretera y tambe reduci trafico y accident di trafico.

Beneficianan di un bon sistema di transporte publico:

- Reduci trafico
- Reduci oranan di biahe
- Reduci contaminacion di aire y sonido
- Reduci importacion di combustibel
- Reduci gastonan di mantencion di caretera
- Mehora movilidad y dependencia ariba otro pa esnan vulnerabel
- Mehora movilidad pa personanan bao 18 aña y otronan cu no por core auto
- Mehora presupuesto di cas pa esnan di menos recurso
- Mehora contacto social
- Crea mas tempo personal ya cu por p.e. lesa, scirbi

Transporte Publico na Aruba ta wordo negligia y den nos presupuesto e ta marginal compara cu otro paisnan. Sigur nos ta reconoce cu limitacion di fondo, poblacion y tamaño ta impone cierto retonan pa desaroyo di un sistema extensivo y eficiente. Tambe nos ta

reconoce cu den nos sociedad tin un prestigio asocia cu tin bo mesun vehiculo mientras esnan cu ta depende ariba transporte publico ta wordo mira como ciudadanonan di segunda clase.

MEHORA PARADANAN DI BUS

Pasaheronan di transporte publico hopi biaha tin cu warda bus. Hopi di e paradhanan di bus no tin ni e minimo infraestructura. Nos kier introduci mas comodidad na paradhanan di bus pa pasaheronan no mester warda den p.e. solo, biento, awa cero etc.

Nos kier upgrade e paradhanan di bus cu no ta ofrece un minimo infraestructura y expande e sistema

- Sigura cu paradhanan di bus tin dak, asiento y un itinerario
- Studia introduci un parada principal na Noord y Santa Cruz manera ta e caso na Oranjestad y San Nicolas
- Studia e posibilidad di integra e paradhanan di bus principal cu esunnan di bus chikito pa mehora conexion

RUTANAN DI BUS

- Digitalisa e itinerario di busnan y ofrece un app cu ta facilita conexion y tambe por ofrece localidad actual di bus door di p.e. GPS
- Studia e posibilidad di con por integra e itinerario di bus grandi cu incentivonan pa busnan chikito pa facilita mihor conexion

AMPLIA ACCESO NA CAYA G.F. BETICO CROES

- Nos kier habri acceso na caya grandi Oranjestad pa bus grandi y chikito por pasa 24/7
- Studia posibilidad di re-dirigi ruta den centro di Oranjestad pa aumenta trafico den caya grandi
- Sigura cu busnan tin preferencia pa reintegra den trafico despues di un parada

ARUBUS

- Mehora coordinacion di capacidad di bus cu demanda
- Mehora acceso pa esnan cu limitacion di movilidad y sigura cu tur bus nobo ta inclui esey
- Studia e transicion pa mas uso di energia renobabel
- Studia e posibilidad di introduci un sistema di 'call-a-ride' pa esnan cu limitacion di movilidad

A21



ACCION★21

Solucion ta cuminsa cu #Accion!